

ԱՐՁԱՆԱԳՐՈՒԹՅՈՒՆ N 1

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐՄԱՎԻՐԻ ՄԱՐԶԻ ԽՈՐՀՐԴԻ 2024
ԹՎԱԿԱՆԻ ՓԵՏՐՎԱՐԻ 16-ԻՆ, ԺԱՄԸ 11-00-ԻՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱՐՄԱՎԻՐԻ ՄԱՐԶՊԵՏ ԴԱՎԻԹ ԽՈՒԴԱԹՅԱՆԻ ՆԱԽԱԳԱՀՈՒԹՅԱՄԲ ԿԱՅԱՑԱԾ
ՆԻՍՏԻ

Մասնակցությամբ՝

- Արմավիր համայնքի ղեկավար՝
- Վաղարշապատ համայնքի ղեկավարի
պարտականությունները կատարող՝
- Մեծամոր համայնքի ղեկավար՝
- Արաքս համայնքի ղեկավար՝
- Խոյ համայնքի ղեկավար՝
- Փարաքար համայնքի ղեկավար՝
- Բաղրամյան համայնքի ղեկավար՝
- Ֆերիկ համայնքի ղեկավար՝
- ՀՀ Արմավիրի մարզպետի խորհրդական՝
- ՀՀ Արմավիրի մարզպետի խորհրդական՝
- ՀՀ Արմավիրի մարզպետի խորհրդական՝
- կառուցվածքային ստորաբաժանումների
ղեկավարների
- Լրատվամիջոցների ներկայացուցիչների

Վարչամ Սարգսյանի

Արսեն Պետրոսյանի
Վահրամ Խաչատրյանի
Ղազար Ղազարյանի
Արգիշտի Մեխակյանի
Դավիթ Մինասյանի
Շանթ Առաքելյանի
Ռուստամ Հասանյանի
Խաչատուր Մկրտչյանի
Արման Խաչատրյանի
Սերյոժա Գրիգորյանի

Օ Ր Ա Կ Ա Ր Գ ՈՒ Մ՝

1. Հայաստանի Հանրապետության Արմավիրի մարզի խորհրդի 2024 թվականի
փետրվարի 16-ի նիստի օրակարգը հաստատելու մասին

/Դավիթ Խուրդայան-

ՀՀ Արմավիրի մարզպետ/

2. Հայաստանի Հանրապետության վարչապետին ներկայացվող Հայաստանի
Հանրապետության Արմավիրի մարզպետի հաշվետվությունը՝ մարզի 2023 թվականի
սոցիալ-տնտեսական վիճակի և մարզպետի գործունեության մասին

/Դավիթ Խուրդայան-

ՀՀ Արմավիրի մարզպետ/

3. Հայաստանի Հանրապետության Արմավիրի մարզի Խոյ համայնքում 2023 թվականի չորրորդ եռամսյակի ընթացքում իրականացված իրավական և մասնագիտական հսկողության արդյունքների և 2024 թվականին իրականացվելիք մարզի տեղական ինքնակառավարման մարմինների լիազորությունների իրականացման նկատմամբ իրավական և մասնագիտական հսկողության աշխատանքային ծրագրի մասին

/Լիաննա Հարությունյան-
<< Արմավիրի մարզպետի աշխատակազմի
իրավաբանական բաժնի պետ/

4. Հայաստանի Հանրապետության Ֆինանսների նախարարության Ֆինանսաբյուջետային վերահսկողության վարչության կողմից մարզի համայնքապետարաններում պետական բյուջեից տրամադրված բյուջետային միջոցների նկատմամբ Ֆինանսական, այդ թվում ստուգումների միջոցով անհրաժեշտ վերահսկողության կազմակերպման արդյունքների մասին

/Խորեն Սարուխանյան-
<< Արմավիրի մարզպետի աշխատակազմի
քաղաքաշինության, հողաշինության և
ենթակառուցվածքների կառավարման
վարչության պետի պարտականությունները կատարող/

5. Հայտարարություններ՝

ա/ 2024 թվականի ընթացքում շարունակվող Հայաստանի Հանրապետության Արմավիրի մարզի համայնքների տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերի ընթացքի և իրականացվելիք աշխատանքների մասին

/Լիլիթ Մուշեղյան-
<< Արմավիրի մարզպետի աշխատակազմի
զարգացման ծրագրերի մշակման և իրականացման բաժնի պետ/

Հայաստանի Հանրապետության Արմավիրի մարզպետ Դավիթ Խուրաթյանը, ողջունելով մարզի խորհրդի նիստի մասնակիցներին, Հայաստանի Հանրապետության Արմավիրի մարզի խորհրդի հաստատմանը ներկայացրեց իր կողմից սահմանված

<<Հայաստանի Հանրապետության Արմավիրի մարզի խորհրդի 2024 թվականի փետրվարի 16-ի նիստի օրակարգը հաստատելու մասին >> որոշման նախագիծը:

Հայաստանի Հանրապետության

Արմավիրի մարզի խորհրդի

Որոշումը

**Հայաստանի Հանրապետության Արմավիրի մարզպետի սահմանած
Հայաստանի Հանրապետության Արմավիրի մարզի խորհրդի 2024 թվականի
փետրվարի 16-ի նիստի օրակարգը հաստատելու մասին**

**Ղեկավարվելով Հայաստանի Հանրապետության կառավարության 2020
թվականի ապրիլի 30-ի N 647-Ն որոշմամբ սահմանված մարզի խորհրդի
կազմավորման և գործունեության կարգի 12-րդ կետի պահանջով.**

Հայաստանի Հանրապետության Արմավիրի մարզի խորհուրդը

որոշում է՝

- 1. Հաստատել Հայաստանի Հանրապետության Արմավիրի մարզպետի սահմանած
Հայաստանի Հանրապետության Արմավիրի մարզի խորհրդի 2024 թվականի
փետրվարի 16-ի նիստի օրակարգը:**

Օրակարգային՝ << Հայաստանի Հանրապետության վարչապետին ներկայացվող
Հայաստանի Հանրապետության Արմավիրի մարզպետի հաշվետվությունը՝ մարզի
2023 թվականի սոցիալ-տնտեսական վիճակի և մարզպետի գործունեության
մասին>> երկրորդ հարցի կապակցությամբ զեկուցմամբ հանդես եկավ Հայաստանի
Հանրապետության Արմավիրի մարզպետ Դավիթ Խուդաթյանը, ով ըստ բնագավառների
ընդհանուր կարգով ներկայացրեց **Հայաստանի Հանրապետության Արմավիրի մարզի
2023 թվականի սոցիալ-տնտեսական վիճակի և մարզպետի գործունեության մասին
Հայաստանի Հանրապետության վարչապետին ներկայացվող հաշվետվությունը:**
Այսպես, նա մասնավորապես նշեց, որ Հայաստանի Հանրապետության կառավարության
տարածքային քաղաքականության իրականացման 2023 թվականի հաշվետու
ժամանակաշրջանում Հայաստանի Հանրապետության Արմավիրի մարզպետի
աշխատակազմի գլխավոր ուղղությունների հիմքում դրված հիմնախնդիրների լուծումները
նպատակաուղղված են եղել մարզի զարգացման համար սոցիալ-տնտեսական
նպաստավոր պայմանների ստեղծմանը և մարզի բնակչության բարեկեցության
բարելավմանը, ինչպես նաև պետական կառավարման համակարգի ու վերջիններիս
տարածքային ստորաբաժանումների, մարզի տեղական ինքնակառավարման
մարմինների միջև համագործակցությանը, պետական և համայնքային շահերի
ներդաշնակեցմանը և տարածքային կայուն, համաչափ զարգացմանը:

Ընդհանուր առմամբ 2023 թվականի ընթացքում մարզպետի աշխատակազմի գործունեությունը եղել է աշխատաշատ և բովանդակալից: Վիճակագրությունը ցույց է տալիս, որ գրեթե բոլոր ուղղություններով մեր կողմից ապահովվել է աճ: Սակայն պետք է գիտակցել, որ մարզում երկար ժամկետով կայուն սոցիալ-տնտեսական զարգացում ու ակտիվություն ապահովելը, մարտահրավերներ հաղթահարելը մեծապես կախված է լինելու բարեփոխումների ճկունությունից և մեր աշխատանքի արդյունավետությունից:

Ֆինանսական բնագավառ

Պետական ֆինանսների կառավարման համակարգի ռազմավարական նպատակներն ուղղված են եղել հանրային կառավարման համակարգի լավագույն արդյունքի և հասարակությանը որակյալ հանրային ծառայությունների մատուցմանը, հանրային կյանքի բարելավմանն ուղղված ծրագրերի իրականացման համար արդյունավետ միջավայրի ստեղծմանը: Պետական կառավարման համակարգի արդյունավետությունն ուղղակիորեն կապված է եղել հանրային միջոցների արդյունավետ ծախսման հետ: Ծախսային քաղաքականության արդյունավետության բարձրացման տեսանկյունից հաշվետու ժամանակահատվածում մարզպետի աշխատակազմում ապահովվել է հանրային ֆինանսների նպատակային, խնայողաբար և արդյունավետ օգտագործումը:

Հայաստանի Հանրապետության Արմավիրի մարզում 2023 թվականին ընդամենը եկամուտների հավաքագրումը պլանավորվել է 14,196,933.4 հազ. դրամ՝ 2022 թվականին պլանավորված 11,711, 228.2 հազ. դրամի համեմատ: 2023 թվականի տարեկան կատարողականը 30.12.2023թ. դրությամբ կազմել է 14,656,745.1 հազ. դրամ, նախորդ տարվա 11,441,798,6 հազ. դրամի համեմատ: Կատարողականը կազմել է 103.2%, նախորդ տարվա 97,7%-ի համեմատ:

2023 թվականին Արմավիրի մարզի համայնքների կողմից սեփական եկամուտների հավաքագրումը պլանավորվել է 4,745,402.4 հազ. դրամ, որը 2022 թվականին պլանավորված 4,266,443.8 հազ. դրամի համեմատ ավել է պլանավորվել 478,958,6 հազ. դրամով, փաստացի հավաքագրումը 30.12.2023թ. դրությամբ կազմել է 5,140,372,1 հազ. դրամ՝ նախորդ տարվա 4,353,525.9 հազ. դրամի համեմատ: Կատարողականը կազմել է 108.3%, նախորդ տարվա 102.0%-ի համեմատ:

2023 թվականի ընթացքում մարզի համայնքներին պետական բյուջեից տրամադրվել է 6,849,910.3 հազ. դրամ դոտացիա, որն ամբողջությամբ հատկացվել է համայնքներին: Աջակցություն է ցուցաբերվել մարզի տեղական ինքնակառավարման մարմիններին համայնքների բյուջեների նախագծերի նախապատրաստման և բյուջետային միջոցների արդյունավետ կառավարման հարցում:

Գյուղատնտեսություն և շրջակա միջավայրի պահպանություն

Գյուղատնտեսություն: Մարզի 123095,2հա վարչական տարածքում 96784,8հա գյուղատնտեսական նշանակության հողեր են, որից 43651,47հա 2023թ. օգտագործվել է գյուղատնտեսական արտադրության մեջ՝ 24992,491հա վարելահողեր, 6471,28հա խաղողի և 12187,7հա պտղատու այգիներ: 2023թ մարզում հիմնվել են 1047,88հա բազմամյա տնկարքներ, որից 990,32հա պտղատու, այդ թվում՝ ինտենսիվ 677,24 հա և 57,56հա խաղողի այգիներ:

2023 թվականին տեղի ունեցած կարկտահարությունները և քամիները մեծ վնաս են պատճառել մարզի գյուղատնտեսական արտադրությանը: Հունիսի 4-ին տեղի ունեցած կարկտահարության հետևանքով վնասվել են Մեծամոր համայնքի Եղեգնուտ, Զարթոնք, Արգավանդ և Արտաշար բնակավայրերի 424 հողօգտագործողների 313,303հա հողատարածությունները՝ 80–100%-ով: Կարկտահարության ռիսկերը մեղմելու նպատակով մարզի 2131,78հա խաղողի և պտղի տարածությունները պատվել են հակակարկտային ցանցերով: Իրականացվել են մարզում տեղակայված 239 հակակարկտային կայանների ապակոնսերվացման, լիցքավորման և առկա թերությունների վերացման աշխատանքները:

Մարզում ջերմոցների և ջերմատների տարածությունը կազմում է 988,345հա, կաթիլային ոռոգվող տարածությունները՝ 4928,31հա, սառնարանային տնտեսությունների կարողությունները՝ 28645 տոննա:

2023 թվականի ընթացքում մարզի գյուղացիական տնտեսություններից մթերող կազմակերպությունների կողմից մթերվել է 6784տ պտուղ, 10541տ բանջարեղեն և 68445,1տ խաղող: Մեծ աջակցություն է ցուցաբերվել առանձին տնտեսավարող սուբյեկտներին և արտահանող կազմակերպություններին գյուղատնտեսական մթերքների արտադրության և արտահանման գործում: Խաղողի մթերման աշխատանքները համակարգելու նպատակով Հայաստանի Հանրապետության Արմավիրի մարզպետի համապատասխան որոշմամբ ստեղծված աշխատանքային խումբն իրականացրել է մշտադիտարկում խաղող մթերող կազմակերպություններում: Ներդրված ջանքերի շնորհիվ հնարավոր դարձավ մթերել խաղողի արտադրված ողջ բերքը:

01.01.2023թ. դրությամբ մարզում հաշվառվել են 52987 գլուխ խոշոր եղջերավոր կենդանիներ, որից կովեր՝ 15567, մանր եղջերավոր՝ 137792, խոզեր՝ 20043, թռչուններ՝ 1040985: 2023 թվականի մարտ ամսին ավարտվել են խոշոր եղջերավոր կենդանիների համարակալման և հաշվառման աշխատանքները: Հակահամաճարակային

միջոցառումներն իրականացվել են ամբողջությամբ: Հակահամաճարակային իրավիճակը բնութագրվում է կայուն:

Համակարգվել է մարզում գործող 3 ջրօգտագործողների ընկերությունների գործունեությունը՝ ոռոգման համակարգի սպասարկման, կառուցման ու վերականգնման, ոռոգման ջրի վարձավճարների գանձման ուղղությամբ: Ուսումնասիրվել և վերահսկվել է ջրատնտեսական համակարգերի գործունեությունը ոռոգման սեզոնի նախապատրաստական աշխատանքների իրականացման ուղղությամբ: Արդյունքում 233,3կմ միջտնտեսային, 4981,2կմ ներտնտեսային ցանցերը, 335 խորքային հորերը և 64 պոմպակայանները պատրաստ են եղել ջրամատակարարմանը, որը սկսվել է ապրիլի 14-ից: 2023 թվականը բնութագրվել է որպես սակավաջուր, քանի որ պակաս էր լցվել Ախուրյանի ջրամբարը, իսկ գետերում ջրի ելը նվազել էր: Ոռոգման բնագավառում ստեղծված լարվածությունը մեղմելու նպատակով սահմանվել է ջրաշրջանառություն և կազմվել ջրամատակարարման հստակ գրաֆիկ, միաժամանակ վերանորոգվել են խորքային հորեր և ոռոգման նպատակով օգտագործվել են համայնքների հաշվեկշռում գտնվող խմելու ջրի նպատակին ծառայող խորքային հորերի հզորությունները: 31.12.2023թ. դրությամբ մարզի 17857 ջրօգտագործողներին մատակարարվել է 285,3 միլիոն մետր խորանարդ ոռոգման ջուր 3,138 մլրդ. դրամ հասույթով, որի դիմաց գանձվել է 1,802 մլրդ. դրամ, կամ գանձման մակարդակը կազմել է 57,4%:

Ոռոգման ջրամատակարարման բարելավման ուղղությամբ մեծ ծավալի աշխատանքներ են իրականացվել 2023 թվականին, մասնավորապես.

պետություն-համայնք համագործակցության սուբվենցիոն ծրագրերով իրականացվել են հետևյալ աշխատանքները՝

ա/ Մեծամոր համայնքի 9-ը բնակավայրերում իրականացվել են 10 խորքային հորերի վերանորոգման աշխատանքներ:

բ/ Արաքս համայնքում կառուցվել է 2 պոմպակայան՝ Լուսազյուղ և Արաքս բնակավայրերում:

գ/ Խոյ համայնքում հիմնանորոգվել է 3 խորքային հորեր, որից 2-ը Արշալույս և 1-ը Հայթաղ բնակավայրերում:

Ուսումնասիրվել և գույքագրվել են մարզի տարածքով հոսող Արաքս, Մեծամոր և Քասախ գետերի, ինչպես նաև հեղեղատարների հունների մաքրման և ափապատնեշների ամրացման նպատակով իրականացվելիք աշխատանքները և տեղեկատվություն է ներկայացվել Հայաստանի Հանրապետության կառավարություն: 2023 թվականին պետբյուջեի միջոցների հաշվին 6 բնակավայրերում մաքրվել է 28,86կմ երկարությամբ բաց դրենաժային ցանց:

Կատարված մոնիթորինգի արդյունքներով գարնանը և աշնանը մարզին հատկացվել է 352 լիտր մկնասպան պրեպարատ, որը բաշխվել է մարզի 3 համայնքների 34 բնակավայրերին, որոնք 4400հա վրա իրականացրել են պայքարի աշխատանքներ:

2023թ. ընթացքում Արմավիրի մարզում պետական աջակցության ծրագրերի շրջանակներում կատարվել են հետևյալ աշխատանքները.

- հիմնվել է 15,3հա ինտենսիվ այգի,
- շուրջ 126հա-ի վրա ներդրվել է ոռոգման արդիական համակարգ,
- կառուցվել է «խելացի անասնագու» 56 գլխի համար և 2740քմ –ի վրա ջերմատուն,
- լիզինգի աջակցության ծրագրերի շնորհիվ ձեռք է բերվել 81 միավոր գյուղատնտեսական տեխնիկա, որից 46-ը տրակտորներ,
- գյուղատնտեսական հումքի մթերումների նպատակով բավարարվել է շահառուների կողմից ներկայացված 51 հայտ,
- կնքվել է գյուղատնտեսության ապահովագրության 1555 պայմանագիր, 1395հա ընդհանուր մակերեսով տարածքի համար: Տրամադրվել է 839 ապահովագրական հատուցում՝ շուրջ 710,8մլն. դրամի չափով:

Շրջակա միջավայրի պահպանություն:

Մարզում կանաչապատ տարածքների ավելացման ուղղությամբ «Հայաստան ծառատունկ» ծրագրի միջոցով, կազմակերպվել ու իրականացվել են տնկումներ՝ շուրջ 5736 ծառերի և թփերի: Մարզի 47 բնակավայրերի տարաբնույթ կազմակերպություններում /գյուղապետարան, դպրոց, եկեղեցի, մշակույթի տուն, անտառ-պուրակներ, զբոսայգիներ ու ճանապարհների եզրեր/ իրականացրվել են ծառերի ու թփերի հիմնումներ, ավելի քան 5,7հա ընդհանուր մակերեսով: 2023 թվականի մարտի 25-ին իրականացվել է համամարզային ծառատունկ: Ծառատունկի ընթացքում համայնքներում տնկվել են 3580հատ գեղատեսիլ ծառերի և թփերի տնկիներ, որը անվճար ձեռք է բերվել «Հայաստան ծառատունկ» ծրագրից:

Սևանա լճում սիգի ձվադրման ժամանակահատվածում՝ 2023 թվականի նոյեմբերի 25-ից մինչև 2024 թվականի հունվարի 20-ը ներառյալ, սիգ ձկան և ձկնկիթի վաճառքը մարզի տարածքում բացառելու նպատակով ինչպես առանձին, այնպես էլ ոստիկանության, բնապահպանության և ընդերքի տեսչական մարմնի, սննդամթերքի անվտանգության տեսչական մարմնի և համայնքների ներկայացուցիչների հետ համատեղ իրականացրել են ստուգայցեր:

Քաղաքաշինություն, հողաշինություն և ենթակառուցվածքների կառավարում

Քաղաքաշինություն: Իրականացվել են մշտադիտարկման գործառույթներ 2022-2023թթ. սուբվենցիոն ծրագրերով իրականացվող շուրջ 172 օբյեկտներում: Կատարվել են 616 այցելություններ շին. աշխատանքների իրականացման ընթացքում՝ 65 օբյեկտներում արձանագրվել են 192 թերություններ, որոնք հետագայում աշխատանքային ընթացակարգով վերացվել են: Կատարվել են օբյեկտը շահագործման ընդունող հանձնաժողովի անդամի պարտականություններ՝ Հայաստանի Հանրապետության Արմավիրի մարզի համայնքների 118 օբյեկտներում:

Հայաստանի Հանրապետության օրենսդրությանը համապատասխան ուսումնասիրվել և վերահսկվել է 217 քաղաքաշինական փաթեթ (հողահատկացում, ինչպես նաև՝ ճարտարապետահատակագծային առաջադրանքի տրամադրում, ճարտարապետահատակագծային նախագծերի փաստաթղթերի համաձայնեցում): Կատարվել են ինքնակամ շինությունների հաշվառման, կասեցման գործառույթներ և համապատասխան ընթացակարգով տեղեկատվությունը ներկայացվել է Հայաստանի Հանրապետության տարածքային կառավարման և ենթակառուցվածքների նախարարություն, Հայաստանի Հանրապետության վարչապետի աշխատակազմ:

Ըստ անհրաժեշտության ստուգումներ են անցկացվել տեղական ինքնակառավարման մարմիններում՝ քաղաքաշինական ծրագրային փաստաթղթերին չհամապատասխանող շինարարության դեպքեր հայտնաբերելիս, ինչպես նաև քաղաքացիների դիմում-բողոքների հիման վրա:

Տրամադրվել է մասնագիտական խորհրդատվություն համայնքների ղեկավարներին և տնտեսավարողներին՝ նոր կառուցվող, հինանորոգվող և վերանորոգվող շենք - շինությունների նախագծման ու կառուցման աշխատանքներում:

Վերահսկողություն է իրականացվել համայնքների քաղաքաշինության գործունեության, այդ թվում նաև անօրինական շինարարությունների կանխման, կասեցման և դրա հետևանքների վերացման ուղղությամբ:

Մասնակցություն է ցուցաբերվել մարզում սուբվենցիոն ծրագրերով համայնքներում իրականացված աշխատանքների ավարտական, հանձնման-ընդունման աշխատանքներին:

Արդյունաբերության, բնակարանային կոմունալ և անշարժ գույքի կադաստրի և աղբահանության բնագավառ:

2023 թվականի ապրիլին մեկ համամարզային և մեկ համապետական շաբաթօրյակների ծրագրերի շրջանակներում համակարգվել է աղբահանության

աշխատանքների իրականացումը: Արդյունքում՝ առաջարկվել է համայնքների ղեկավարներին խստացնել հսկողությունը աղբահանության վարձավճարների հավաքագրման և իրավաբանական անձանց հետ պայմանագրերի կնքման վերաբերյալ գործողությունները:

Մարզում առկա են 3 օրինական աղբավայրեր, Բաղրամյան համայնքում առկա են 14 բացվող և փակվող աղբավայրեր: Բնակավայրերի մաքրման և աղբահեռացման ուղղությամբ Արմավիրի մարզպետի համապատասխան կարգադրությամբ ստեղծված հանձնաժողովի կողմից պարբերաբար ստուգայցեր են կատարվել համայնքներ, տեղ գտած թերությունների վերացման նպատակով առաջարկություններ են արվել համայնքների ղեկավարներին՝ կազմակերպելով և համակարգելով վերջիններիս գործունեությունը տվյալ ոլորտում:

2023 թվականին պլանավորված տարեկան եկամուտը աղբահանությունից կազմել է 412,183.5 հազ. դրամ, 30.12.2023 թ. դրությամբ հավաքագրումը կազմել է 379,080.2 հազ. դրամ, կատարողականը կազմել է 92.0%: Համայնքներից ընդունվել, ամփոփվել և Հայաստանի Հանրապետության տարածքային կառավարման և ենթակառուցվածքների նախարարություն են ներկայացվել՝ աղբահանության գծով ամսական հավաքագրված գումարների և կատարված ծախսերի վերաբերյալ հաշվետվություններ:

Մարզի բնակչության շրջանում աղիքային վարակիչ հիվանդությունների և ջրային բռնկումներից խուսափելու համար առաջարկվել է համայնքների ղեկավարներին ձեռնարկել համապատասխան կանխարգելիչ միջոցներ:

Ջրամատակարարման և ջրահեռացման բնագավառում իրականացվել են ջրային տնտեսության պետական կոմիտեի կազմակերպությունների կողմից սպասարկվող համայնքների ջրամատակարարման և ջրահեռացման աշխատանքների համակարգման և կազմակերպման գործընթացները:

Առաջարկվել են համայնքների ղեկավարներին գերեզմանատեղերի անվճար և վճարովի հիմունքներով տրամադրման գործընթացի, բարեկարգման, պահպանման ու շահագործման կանոնները պահպանելու նկատմամբ՝ սահմանել խիստ հսկողություն:

Ճանապարհաշինություն՝ ընդհանուր օգտագործման միջպետական, հանրապետական և մարզային (տեղական) նշանակության ավտոմոբիլային ճանապարհների պահպանման և շահագործման աշխատանքների վերաբերյալ իրականացված աշխատանքներ:

Հայաստանի Հանրապետության Արմավիրի մարզի ավտոմոբիլային ճանապարհների ընդհանուր երկարությունը կազմում է 608,6 կմ, որից՝
– միջպետական նշանակության՝ 90,3 կմ,

–հանրապետական նշանակության՝ 124,5կմ,

–մարզային /տեղական/ նշանակության 393,8կմ:

Մարզի ընդհանուր օգտագործման մարզային/տեղական/ նշանակության ավտոմոբիլային ճանապարհներից վատ և շատ վատ վիճակում են գտնվում 101,0կմ-ը:

2023 թվականի ընթացքում մարզային նշանակության ավտոճանապարհների (ընդհանուր՝ 393,8կմ) ամառային և ձմեռային պահպանման աշխատանքների համար հատկացվել է 89,440.0հազ. դրամ, որով իրականացվում է 75,21կմ ամառային պահպանություն /փոսալցման, աղբի, օտար առարկաների հեռացման, կողնակների հարթեցման աշխատանքներ/ և 115,3կմ ձմեռային պահպանություն:

Հայաստանի Հանրապետության Արմավիրի մարզի մարզային նշանակության ավտոճանապարհների 1049 «Ճանապարհային ցանցի բարելավում» ծրագրի, 11002 «Մարզային նշանակության ավտոճանապարհների պահպանման և անվտանգ երթևեկության ծառայություններ» միջոցառման գծով, 2024 թվականի բյուջետային լրացուցիչ ֆինանսավորման վերաբերյալ ընթացիկ ամառային, ձմեռային պահպանման, գծանշման և նշանների տեղադրման աշխատանքների համար հատկացվել է 190.000.000 ՀՀ դրամ, որից՝ 100,000,000 ՀՀ դրամը՝ ամառային -85,5կմ և ձմեռային - 130,65կմ պահպանման 90,000,000 ՀՀ դրամ, որից՝ 85,500,000 ՀՀ դրամ ընդհանուր 270կմ գծանշման և 4,500.000 ՀՀ դրամ նշագծման աշխատանքների և նոր տեղադրվող 150 հատ նշանների համար: Նշագծման և նշանների տեղադրման համար նախատեսվող գումարները կարող են փոփոխվել:

2023 թվականի ընթացքում հիմնանորոգվել և վերանորոգվել են սուբվենցիոն ծրագրերով 19,7կմ և Հայաստանի Հանրապետության պետական բյուջեի ֆինանսավորմամբ՝ 28,36կմ ճանապարհներ: Հայաստանի Հանրապետության տարածքային կառավարման և ենթակառուցվածքների նախարարության կողմից իրականացվող միջպետական և հանրապետական նշանակության ավտոճանապարհների միջին նորոգման և քանդման (ասֆալտի քերուկ/ֆրեզ) աշխատանքների ընթացքում իրականացվել է վերահսկողություն և գոյացած 5100 մ/խ ասֆալտի քերուկը/ֆրեզ/ հանձնվել է մարզի համայնքներին:

Միասնական երթուղային ցանց: 2021 թվականի նոյեմբերի 9-ին կայացել է մարզի միասնական երթուղային ցանցը սպասարկող օպերատորի ընտրության մրցույթը, որի արդյունքում Վաղարշապատ տարածաշրջանի միասնական երթուղիների սպասարկման իրավունք է ստացել «Էջմիածնի ԲՈՒԱՏ» ԲԲԸ-ն՝ 10 տարի սպասարկման ժամկետով:

Ներկայումս մարզի Արմավիր տարածաշրջանի միասնական երթուղային ցանցը սպասարկող օպերատորի ընտրության մրցույթի արդյունքները վիճարկվում են դատական

կարգով: Արմավիր տարածաշրջանի նոր տրանսպորտային ցանցի սպասարկումը կիրականացվի դատական գործընթացի ավարտից հետո:

Արմավիր տարածաշրջանի տրանսպորտային ցանցի սպասարկումը իրականացվում է հետևյալ կազմակերպությունների կողմից. «Գալակտիկա Տրանս Սերվիս», «Ալ-Տրանս», «Տրանս Կոմֆորտ-999», «Ռամ-Ակա», «Հրաչյա և Տիգրան» ՍՊԸ:

Հողաշինություն: Հողերի օգտագործման ժամանակավոր սխեմաների հաստատման նպատակով սահմանված կարգով կազմվել և Հայաստանի Հանրապետության քաղաքաշինության կոմիտե է ներկայացվել 98 նպատակային նշանակության փոփոխության վերաբերյալ հողաշինական գործ: Միջգերատեսչական հանձնաժողովի կողմից տրված 35 դրական եզրակացությունները ներկայացվել են համայնքների ղեկավարներին՝ առաջարկելով համաձայն Հայաստանի Հանրապետության կառավարության 2011 թվականի դեկտեմբերի 29-ի N 1920-Ն որոշման ընդունել ավագանու համապատասխան որոշումներ և կատարել պետական գրանցումներ:

Վերահսկողություն է իրականացվել մարզի համայնքներում հողամասերի նպատակային նշանակության փոփոխություն կատարելու հետևանքով կատարված աշխատանքների նկատմամբ, հավաքագրվել և Հայաստանի Հանրապետության տարածքային կառավարման և ենթակառուցվածքների նախարարություն են ներկայացվել տվյալներ: Իրականացվել է համայնքների վարչական սահմաններում գտնվող հողամասերի աճուրդային վաճառքի և վարձակալության տրամադրման վերաբերյալ տվյալների հավաքագրում, ամփոփում և տեղեկատվություն է ներկայացվել Հայաստանի Հանրապետության տարածքային կառավարման և ենթակառուցվածքների նախարարություն:

Հայաստանի Հանրապետության կառավարության 17.09.2009թ. N 1066-Ն որոշմամբ և Հայաստանի Հանրապետության Արմավիրի մարզպետի 12.11.2009թ. N 151 կարգադրությամբ ստեղծված հանձնաժողովի կազմում կազմակերպված ուսումնասիրությունների արդյունքում մարզի Արմավիր, Վաղարշապատ, Բաղրամյան, Մեծամոր, Խոյ և Արաքս համայնքների բնակավայրերի համար տրվել է եզրակացություն՝ բարձրաժեք հողատեսքերը ցածրաժեք հողատեսքերի փոխադրելու վերաբերյալ /ընդամենը 244,04հա, որից խաղողի այգի՝ 167.9 հա, պտղատու այգի՝ 76.14հա/:

Մարզում «ՔՈԱՖ ՍՄԱՐԹ» կենտրոն հիմնելու նպատակով «Հայաստանի մանուկներ» բարեգործական հիմնադրամին հողատարածք հատկացնելու համար օրենքով սահմանված կարգով Արմավիրի համայնքապետարանի հետ կազմվել և Հայաստանի Հանրապետության կառավարություն են ներկայացվել հողամասերի վկայականները, հատակագծերը և Հայաստանի Հանրապետության կառավարության «Հողամասի

նվիրաբերությանը համաձայնություն տալու մասին» որոշման նախագիծը, որի արդյունքում շուրջ 8.0հա հողամասի նպատակային նշանակության փոփոխության աշխատանքներ են իրականացվել:

Քննարկման արդյունքում Հայաստանի Հանրապետության տարածքային կառավարման և ենթակառուցվածքների նախարարություն են ներկայացվել 2022թ. համար տիեզերալուսանկարների պահանջարկի վերաբերյալ հայտերը: Ընթացքի մեջ են ՓՀԷԿ-երի սեփականությունը հանդիսացող հողամասերի կադաստրային քարտեզներում հողամասերի սահմանների և տեղադիրքերի սխալների, ինչպես նաև նպատակային ու գործառնական նշանակությունների անհամապատասխանությունների շտկման ուղղությամբ տարվող աշխատանքները:

Հայաստանի Հանրապետության կադաստրի կոմիտեի e-cadastr.am էլեկտրոնային հարթակում առկա հասցեների և փաստացի հասցեավորման վերաբերյալ համայնքապետարաններում առկա տվյալների համեմատման ուղղությամբ տարված աշխատանքների արդյունքում բացի Վաղարշապատ և Փարաքար համայնքներից մյուս համայնքներում իրականացվել են ճշգրտման աշխատանքներ:

Կրթություն, մշակույթ և սպորտ

Կրթություն: Հաշվետու ժամանակաշրջանում մարզում գործել է 119 հանրակրթական ուսումնական հաստատություն: Ընդհանուր առմամբ՝ քաղաքային 24 և գյուղական՝ 95 դպրոցներ: Այդ թվում՝ մարզպետի աշխատակազմի ենթակայությամբ գործող 111 հանրակրթական դպրոց, որից 91-ը՝ միջնակարգ, 20-ը՝ հիմնական, նախակրթարան գործում է 62-ում, ԿԳՄՍ նախարարության ենթակայության 6 հանրակրթական ուսումնական հաստատություն, այդ թվում՝ 5 ավագ դպրոց, 1 ռազմամարզական վարժարան, 2 ոչ պետական հանրակրթական ուսումնական հաստատություններ՝ Մայր Աթոռ Սուրբ Էջմիածնի «ԷՕՐՆԵԿԵԱՆ ՀԱՆՐԱԿՐԹԱԿԱՆ ԴՊՐՈՑ» հանրակրթական ուսումնական հաստատություն-հիմնարկ պետական ոչ առևտրային կազմակերպություն և «Գրիգոր Լուսավորիչ» ոչ պետական կրթահամալիր:

Մարզում գործում են ԿԳՄՍ նախարարության ենթակայության միջին մասնագիտական ուսումնական հաստատություններ՝ 3 պետական քոլեջ և 1 արհեստագործական ուսումնարան:

2023-2024 ուսումնական տարում մարզի դպրոցների աշակերտների թիվը կազմել է՝ 37439, նախակրթարանի սաների թիվը՝ 1250: Գործող ՆՈՒՀ –երի թիվը՝ 65, երեխաների թիվը՝ 5819:

2023 թվականի հունվարի 1-ից մինչև 2023 թվականի դեկտեմբերի 22-ը իրականացվել են հետևյալ աշխատանքները՝

2023-2024 ուստարվա ընթացքում կրթության շարունակականության ապահովման նպատակով ԼՂ-ից բռնի տեղահանված երեխաներին ուսումնական գործընթացից դուրս չթողնելու նպատակով ցուցաբերվել է համապատասխան աջակցություն: 2023 թվականի դեկտեմբերի 25-ի դրությամբ մարզպետի աշխատակազմի ենթակայությամբ գործող դպրոցներում սովորում են Լեռնային Ղարաբաղից Հայաստանի Հանրապետություն տեղափոխված 1464 երեխաներ:

«Տարածքային կառավարման մասին» Հայաստանի Հանրապետության օրենսդրությամբ մարզպետին վերապահված լիազորությունների շրջանակում մարզպետի աշխատակազմի ենթակայությամբ գործող 111 հանրակրթական ուսումնական հաստատություններից 13-ում իրականացվել են մշտադիտարկման աշխատանքներ: Մշտադիտարկման ընթացքում դպրոցների տարբեր դասարաններում տրվել են նաև գրավոր աշխատանքներ «Հայոց լեզու» և «Մաթեմատիկա» առարկաներից՝ մարզում նշված առարկաների ուսուցման որակի վերաբերյալ ընդհանրական տեղեկատվություն ունենալու նպատակով:

2023 թվականի ուսումնական տարվա 2-րդ կիսամյակի ընթացքում իրականացվել են մշտադիտարկումներ /107 դպրոցներում/:

2023 թվականին Արմավիրի մարզից Գնահատման և թեստավորման կենտրոնի dimord.am կայքում դիմում-հայտ է լրացրել 987 դիմորդ, ընդունվել է 729 դիմորդ (75,7%): Հայաստանի Հանրապետության կառավարության 2011 թվականի նոյեմբերի 10-ի N 1745-Ն որոշմամբ հաստատված կարգի համաձայն՝ Հայաստանի Հանրապետության Արմավիրի մարզպետի աշխատակազմի ենթակայությամբ գործող 111 ուսումնական հաստատությունների՝ 2023 թվականին պարտադիր ատեստավորում է անցել 688 ուսուցիչ:

2023 թվականին մարզի 235 ուսուցիչներ հաղթահարել են կամավոր ատեստավորման շեմը և ընդգրկվել հավելավճարների տրամադրման ծրագրում:

2022-2023 ուսումնական տարվա օլիմպիադայի տարածքային փուլին մասնակցած 4748 աշակերտից մարզային փուլին երաշխավորվել և մասնակցել է 609 աշակերտ: Մարզային փուլի՝ 609 մասնակցից հանրապետական փուլին երաշխավորվել է մասնակցել 78 աշակերտ: 2022-2023 ուսումնական տարվա անցկացված հանրապետական փուլի արդյունքներով Արմավիրի մարզի աշակերտներն ունեն՝ 3 հատ 1-ին կարգի, 5 հատ 2-րդ կարգի և 5 հատ 3-րդ կարգի դիպլոմ, ևս 9 հատ գովասանագիր:

Մարզպետի աշխատակազմի ենթակայությամբ գործող դպրոցներում դեկտեմբերի 25-ի դրությամբ ԼՂ-ից բռնի տեղահանված 48 ուսուցիչ է աշխատում /27-ը գործուղված, 2-ը

ընդհանուր հիմունքներով, 19-ը ժամանակավոր/։ Ինչպես նաև այլ հաստիքներ՝ վարչատնտեսական համակարգող -1, ուսուցչի օգնական -9, հոգեբան -1, լաբորանտ -8, հավաքարար -10, բանվոր -2, գործավար -1, դաստիարակի օգնական -2, տնտեսվար -1, էլ. կառավարման և դասավանդման ապահովման մասնագետ -1, պահակ -2, ԴԱԿ -1։

Հայաստանի Հանրապետության կառավարության 2021թ. մայիսի 5-ի N 823-Ն որոշման համաձայն «Մոդուլային տիպի մանկապարտեզների շենքային ապահովում» միջոցառման շրջանակներում մոդուլային տիպի մսուր-մանկապարտեզներ են կառուցվում Այգեվան, Լենուդի, Գետաշեն, Նորավան և Փշատավան համայնքներում։ Արևիկ համայնքում մոդուլային տիպի մանկապարտեզի կառուցման աշխատանքներն ավարտական փուլում են։

Համաշխարհային բանկի կողմից ֆինանսավորվող «Կրթության բարելավման ծրագրի լրացուցիչ ֆինանսավորում» վարկային ծրագրի շրջանակներում իրականացվող «Դպրոցին երեխաների պատրաստվածության մակարդակի բարձրացում և կրթության հավասար մեկնարկային հնարավորությունների ապահովում» ենթածրագրի շրջանակներում ստեղծվել է 9 նոր նախակրթարան՝ Մյասնիկյան, Բերքաշատ, Զարթոնք, Տարոնիկ, Ակնաշեն, Մուսալեռ, Արմավիր /Արմավիր 10/, Դալարիկ, Երվանդաշատ բնակավայրերում։

Հայաստանի Հանրապետության կառավարության և Ասիական զարգացման բանկի միջև իրականացվող դպրոցների սեյսմիկ անվտանգության բարելավման ծրագրի շրջանակներում ընթանում են Փարաքարի և Մրգաշատի թիվ 1 միջնակարգ դպրոցների կառուցման աշխատանքները։ Արգինայի և Պոդունքի Տիգրան Մեծի անվան միջնակարգ դպրոցները կառուցվել և հանձնվել են շահագործման։ Զրարբիի միջնակարգ դպրոցում Հայաստանի Հանրապետության կառավարության և Ասիական զարգացման բանկի միջև իրականացվող դպրոցների սեյսմիկ անվտանգության բարելավման ծրագրի շրջանակներում նախատեսվում է դպրոցական նոր շենքերի կառուցում։

«Կրթության բարելավման ծրագրի լրացուցիչ ֆինանսավորում» վարկային համաձայնագրի շրջանակում մարզպետի աշխատակազմի ենթակայությամբ գործող 87 հանրակրթական դպրոցներում հիմնվել և վերազինվել են նոր լաբորատորիաներ, ժամանակակից բնագիտական և ինժեներական լաբորատոր սարքավորումներով և գույքով, ինչպես նաև անհրաժեշտ համակարգչային սարքավորումներով։

Մարզպետի աշխատակազմի ենթակայությամբ գործող 9 դպրոցի մարզադահլիճներ հիմնանորոգվում են (Ջանֆիդա, Արտիմետ, Արագած, Շահումյան, Սարդարապատ, Փշատավան բնակավայրերի միջնակարգ և Արմավիրի թիվ 6, Արմավիրի թիվ 8, Վաղարշապատի թիվ 7 հիմնական դպրոցներ)։ Շինարարական, ինչպես նաև նոր գույքի ստացման աշխատանքները ավարտական փուլում են։

Հայաստանի Հանրապետության կառավարության 18.08.2021թ. N 1363-Ա որոշմամբ հաստատված՝ «Մարդկային կապիտալի զարգացում» բաժնի «Կրթություն» ենթաբաժնի՝ մինչև 2026 թվականը կառուցվող, հիմնանորոգվող կամ վերակառուցվող 300 դպրոցների և 500 մանկապարտեզների ծրագրի՝ Հայաստանի Հանրապետության մարզերում կրթական որակյալ ծառայությունների հասանելիության ապահովման ծրագրի շրջանակում մարզի 12 դպրոցներ վերակառուցվելու են:

Մշակույթ և սպորտ

«Ազգային, փողային և լարային նվագարանների գծով ուսուցում» ծրագրի շրջանակներում մարզի 12 երաժշտական և արվեստի դպրոցների 82 աշակերտների Հայաստանի Հանրապետության պետական բյուջեով հատկացվել է փոխհատուցում 17.866.500 ՀՀ դրամ:

ԿԳՄՄՆ «Քույր դպրոցներ» ծրագրի շրջանակներում իրականացվել է Արմավիրի մարզի և Երևան քաղաքի արվեստի և երաժշտական դպրոցների աշակերտների համատեղ համերգների և ցուցահանդեսների կազմակերպում:

Հունվար-փետրվար ամիսներին կազմակերպվել են «Հայաստանի Հանրապետության վարչապետի գավաթ» սիրողական սեղանի թենիսի մրցաշարի համայնքային և մարզային փուլերը և 12 լավագույն թենիսիստներ ապրիլի 1-2-ը մասնակցել են Չարենցավանում անցկացված հանրապետական եզրափակիչ փուլին:

Հունվարի 27-29-ը Հայաստանի Հանրապետության Արմավիրի մարզպետի աշխատակազմի թիմը մասնակցել է Հայաստանի Հանրապետության ԿԳՄՍ նախարարության կողմից կազմակերպված պետական մարմինների աշխատակիցների միջև անցկացվող հրաձգության մրցումներին:

Մարտ ամսին մարզի հանրակրթական դպրոցներին բաժանվել է դպրոցական բաժանորդային համակարգի աբոնեմենտներ:

Ապրիլի 26-28-ը մարզի հանրակրթական դպրոցներում Հայաստանի Հանրապետության ԿԳՄՍ նախարարության հետ համատեղ կազմակերպվել է «Քո արվեստը դպրոցում» մշակութային ծրագիրը՝ հայտնի արվեստագետների մասնակցությամբ, որին մասնակցել է 55 դպրոցների 576 աշակերտ:

Ապրիլի 28-ին Հայաստանի Հանրապետության ԿԳՄՍ նախարարության «Դասարվեստ» կրթամշակութային ծրագրով մարզի 3 դպրոցներում կազմակերպվել է Հայաստանի ազգային պատկերասրահի լավագույն կերպարվեստի ցուցանմուշների ցուցադրություն:

Ապրիլ-նոյեմբեր ամիսներին անցկացվել է հանրակրթական դպրոցների 7-12-րդ դասարանների աշակերտների Սպարտակիադա 8 մարզաձևերից:

Փետրվար-ապրիլ ամիսներին կազմակերպվել է հանրակրթական դպրոցների 1-3-րդ և 4-6-րդ դասարանների աշակերտների «Սպորտլանդիա» մարզական միջոցառումը:

Ապրիլ-մայիս ամիսներին կազմակերպվել է «Հայաստանի Հանրապետության Վարչապետի գավաթ» դպրոցականների թիմային խճուղավազքի մարզային փուլը, որին մասնակցել են 30 հանրակրթական դպրոցների թիմեր՝ 210 մասնակից:

Ապրիլի 29-ին մարզի քաղաքային համայնքներում կազմակերպվել են «Քաղաքացու օրվան» նվիրված միջոցառումներ:

Մայիսի 28-ին ապահովվել է մարզի 12 հեծանվորդների մասնակցությունը Շորժայում կայացած «Հայաստանի Հանրապետության վարչապետի գավաթ» խճուղային հեծանվավազքի սիրողական մրցաշարին:

Հունիսի 30-ից հուլիսի 21-ը կազմակերպվել և անցկացվել է մարզի պետական և տեղական ինքնակառավարման մարմինների աշխատակիցների միջև ֆուտբոլի առաջնություն՝ 20 թիմերի մասնակցությամբ:

Ապահովվել է մարզի 6 համայնքների թիմերի և 234 մարզիկների մասնակցությունը օգոստոսի 5-19-ը կայացած Համահայկական ամառային 8-րդ խաղերին:

Օգոստոսի 19-ին մարզի լողորդները մասնակցել են «ՀՀ Վարչապետի գավաթ» լողի սիրողական մրցաշարին:

ՀՀ Տավուշի մարզի Դիլիջան համայնքում 2023 թվականի սեպտեմբերի 9-ին «Մշակութային վերածնունդ» արվեստների և արհեստների փառատոնին ներկայացվել են մարզի 6 համայնքների տաղավարներ՝ մշակույթի, արվեստի գործերի ցուցադրությամբ, ինչպես նաև երգի-պարի համույթների ելույթներ:

Սեպտեմբեր-նոյեմբեր ամիսներին ՀՖՖ-ի հետ համատեղ կազմակերպվել են ֆուտբոլի դպրոցական առաջնության տարածքային և մարզային փուլերը, որին մասնակցել է 43 թիմ:

Նոյեմբերի 4-ին ապահովվել է մարզի շուրջ 730 վազորդների մասնակցությունը «ՀՀ Վարչապետի գավաթ» խճուղային կրոսավազքի սիրողական մրցաշարին:

Դեկտեմբերի 6-7-ը մարզպետի աշխատակազմի թիմը մասնակցել է Հայաստանի Հանրապետության ԿԳՄՍ նախարարության կողմից կազմակերպված պետական մարմինների աշխատակիցների միջև անցկացվող «Բուրգ» բիլիարդի առաջնությանը:

Առողջապահության և սոցիալական ոլորտի հարցեր

Առողջապահության բնագավառ: Մարզի առողջապահական համակարգում գործում են 56 բուժաօգնություններ՝ 52 համայնքային, 4 մարզպետի աշխատակազմի ենթակայության: Առողջապահական համակարգում աշխատում են՝ 430 բժիշկներ և 743

միջին բուժանձնակազմ: Մեկ բժիշկը միջինում սպասարկում է 710 բնակչի: Մարզի բուժհաստատությունների մահճակալների թիվը 365 է:

Մարզպետի աշխատակազմի ենթակայության 4 բուժհաստատությունների գլոբալ բյուջեն 2023թ դեկտեմբերի 1-ի դրությամբ կազմել է 3.789.403.3 հազ. ՀՀ դրամ: 2022թ. դեկտեմբերի 1-ի դրությամբ կազմել է 2.505.740.6 հազ. ՀՀ դրամ:

2022թ. վճարովի ծառայությունները կազմել են 658.588.1հազ. դրամ մինչդեռ 2023թ. կազմել է 896.420.305 հազար դրամ:

2023թ. մարզում գրանցվել է 1372 ծնունդ, որից 618 աղջիկ 763 տղա/ներառյալ զույգեր/:

2023թ. կենտրոնացված գնմամբ և մարդասիրական ճանապարհով տարբեր հիվանդությունների բուժման նպատակով ստացվել և բուժհաստատություններին են բաշխվել 122.057.886 հազ. դրամ արժողությամբ տարբեր դեղամիջոցներ, որից 98.668.983հազ. դրամ արժողությամբ հակադիաբետիկ դեղորայք:

2023թ. մարզի ԱԱՊ օղակում հաշվառված են եղել 11053 դիաբետով հիվանդներ:

2023թ. մարզպետի աշխատակազմի ենթակայության առողջապահական հիմնարկներում աշխատավարձի պարտքեր չեն ձևավորվել:

Արմավիր ԲԿ-ի ինֆեկցիոն բաժանմունքի վերակառուցման աշխատանքները մոտենում են ավարտին: Հայաստանի Հանրապետության Արմավիրի մարզպետի աշխատակազմի ջանքերով և Հայաստանի Հանրապետության պետական բյուջեի միջոցներով ամբողջությամբ վերանորոգվում և վերազինվում է Էջմիածնի ԲԿ ՓԲԸ-ը: Հայաստանի Հանրապետության պետական բյուջեի միջոցներով Էջմիածնի ԲԿ-ի համար ձեռք է բերվել ընդհանուր անզգայացման սարք, դեֆիբրիլատոր և ճկուն էնդոսկոպիկ համակարգ ընդհանուր 32.480 հազ.դրամ արժողությամբ, Արմավիր ԲԿ-ի համար ձեռք է բերվել ավտոկլավ, կենսաքիմիական վերլուծիչ, ախտորոշման գերձայնային ուլտրաձայնային և դոպլեր սարք, ռենտգեն սարք, էնդոսկոպ և ավտոմատ արյունաբանական վերլուծիչ, ընդհանուր 45.636.4 հազ. դրամ արժողությամբ, Հիսուսի մանուկներ Ակ-ի համար ձեռք է բերվել ավտոռեֆրակտոմետր 7.600 հազ. դրամ արժողությամբ:

Մարզպետի աշխատակազմի ջանքերով պարբերաբար իրականացվում են սկրինինգային ծրագրեր, որի շրջանակներում մարզի բուժհաստատություններ են եկել մի շարք բժիշկներ, արդյունքում պացիենտներին տրամադրվել է անվճար խորհրդատվություն, իսկ անհրաժեշտության դեպքում իրականացվել են մի շարք հետազոտություններ:

Նախատեսվում է առաջիկա տարվա ընթացքում վերանորոգել Արմավիր ԲԿ-ի պոլիկլինիկայի մասնաշենքը: Աշխատանքները կրելու են շարունակական բնույթ, որն

ունենալու է իր դրական ազդեցությունը մարզի բժշկական կազմակերպությունների որակյալ ծառայությունների մատուցման համար:

Սոցիալական պաշտպանության բնագավառ: Հայաստանի Հանրապետության Արմավիրի մարզի միասնական սոցիալական ծառայության 3 տարածքային կենտրոններում 2024 թվականի հունվարի 1-ի դրությամբ փաստագրված ընտանիքների թիվը կազմել է 6034, որոնցից նպաստառու են 5004-ը, հրատապ դրամական օգնություն է ստացել 1021 ընտանիք, հաշվառվել է աշխատանք փնտրող 7028 մարդ, որոնցից աշխատանքի է տեղավորվել 651 մարդ, գործազուրկի կարգավիճակ է ստացել 4729-ը: 2023 թվականին հաշվառված կենսաթոշակառուների թիվը կազմել է 47943:

«Մարզպետի աշխատակազմի կողմից իրականացվող ծրագրերի այլ նպաստներ բյուջեից» հոդվածով 2023 թվականի ընթացքում դրամական օգնություն է հատկացվել սոցիալապես անապահով 767 ընտանիքների՝ 28,490.0 հազ. դրամ գումարի չափով:

Հայաստանի Հանրապետության կառավարության որոշումների համաձայն մարզպետի աշխատակազմում հաշվառվել է բնակարանային պայմանների բարելավման կարիք ունեցող հաշմանդամ դարձած՝ 120 զինծառայողների/ազատամարտիկների/ ընտանիք: 2023 թվականի ընթացքում մարզպետի աշխատակազմում հաշվառվել է զոհված զինծառայողի 8 ընտանիք և հաշմանդամ դարձած զինծառայողի 1 ընտանիք, որոնք համայնքների ղեկավարների որոշմամբ ճանաչվել են բնակարանի կարիքավոր: 2023 թվականի ընթացքում Հայաստանի Հանրապետության պաշտպանության նախարարության կողմից 3 զինհաշմանդամի ընտանիք ստացել է բնակարանի գնման վկայագիր:

Զբաղվածության կարգավորման ամենամյա պետական ծրագրով մարզում իրականացվել է «Սեզոնային զբաղվածության խթանման միջոցով գյուղացիական տնտեսությանն աջակցության տրամադրման» ծրագիրը, ըստ որի մարզին հատկացվող ֆինանսական միջոցների չափը կազմել է 57,535.5 հազ. դրամ՝ 228 ծրագրի համար (Արմավիր՝ 22,459.0 հազ. դրամ, 89 ծրագիր, Բաղրամյան՝ 17,412.0 հազ. դրամ, 69 ծրագիր, Վաղարշապատ՝ 17,664.4 հազ. դրամ, 70 ծրագիր): Արդյունքում՝ մարզի 3 միասնական սոցիալական ծառայություններում իրականացվել է 251 ծրագիր /Արմավիր՝ 99 ծրագիր, Վաղարշապատ՝ 74 ծրագիր, Բաղրամյան՝ 78 ծրագիր/:

2022 թվականի մարտի 10-ին Հայաստանի Հանրապետության կառավարությունն ընդունել է թիվ 283-Ն որոշումը, որով կարգավորվում է 1988-1992 թվականներին ԼՂ-ից բռնի տեղահանված ընտանիքների բնակարանային ապահովության ծրագրի իրականացումը Հայաստանի Հանրապետության մարզերում: Հայաստանի Հանրապետության Արմավիրի մարզում վերոնշյալ ծրագրի շահառու է ճանաչվել 15

ընտանիք, որոնցից 13-ին /2 ընտանիք հրաժարվել է/ 2023 թվականին տրամադրվել են բնակարանի գնման վկայագրեր:

Ընտանիքի, կանանց և երեխաների իրավունքների պաշտպանություն: Իրականացվել են աշխատանքներ՝ ընտանեկան բռնության 41 դեպքերի հաշվառման և հետագա մասնագիտական շարունակական աշխատանքի և միջգերատեսչական համագործակցության ապահովման ուղղությամբ:

Իրականացվել է սոցիալապես անապահով 1405 ընտանիքների կարիքների գնահատում և տրամադրվել է աջակցության անհրաժեշտության վերաբերյալ եզրակացություններ:

Մարզի հանրակրթական ուսումնական հաստատությունների տնօրենների հետ պարտադիր կրթությունից դուրս մնացած երեխաների հիմնահարցերի առնչությամբ համատեղ աշխատանքների արդյունքում ձեռնարկվել են հնարավոր բոլոր միջոցները պարտադիր ուսուցումից դուրս մնացած 54 աշակերտներին ուսումնական պրոցեսում ընդգրկելու նպատակով:

Հայաստանի Հանրապետության ՆԳՆ ոստիկանության Արմավիրի մարզային վարչությունից ստացվել է վարչության ենթակա ՆԳ բաժինների ԱԳԲ և ԸԲԿ-ում հաշվառման մեջ գտնվող և փաստացիորեն հայտնի մուրացիկ, թափառաշրջիկ, իրավախախտ, հանցագործության կատարման մեջ մեղադրվող, անչափահաս երեխաների վերաբերյալ տեղեկատվություն՝ նրանց շրջանում համապատասխան աշխատանքներ կատարելու նպատակով: Իրականացված աշխատանքների արդյունքում 3 անչափահասներ դուրս են եկել հաշվառումից, 3 անչափահասների վարքագծի նկատմամբ իրականացվել է հսկողություն:

Սկզբնական հաշվառման վերցված առանց ծնողական խնամքի մնացած 2 երեխաների անձնական գործերը ներկայացվել են Հայաստանի Հանրապետության ԱՍՀՆ կենտրոնացված հաշվառման: Հայաստանի Հանրապետության Արմավիրի մարզի բնակիչ հանդիսացող 7 քաղաքացիներ հաշվառվել են, որպես որդեգրել ցանկացող անձինք և ներկայացվել են Հայաստանի Հանրապետության ԱՍՀՆ կենտրոնացված հաշվառման: Խնամատար ընտանիքում տեղավորված 3 երեխաների ընտանիքների նկատմամբ իրականացվել է մշտադիտարկում և նրանց հետ կնքված պայմանագրերը երկարացվել են, ինչպես նաև կնքվել նոր խնամատարություն իրականացնող ընտանիքի հետ նոր պայմանագիր:

Առանց ծնողական խնամքի մնացած 1 երեխա տեղափոխվել է Երևանի «Մանկան տուն» ՊՈԱԿ: Փաստացի առանց ծնողական խնամքի մնացած 6 անչափահաս երեխաներ տեղավորվել են «Շիրակի մարզի երեխաների աջակցության կենտրոն», առանց

ծնողական խնամքի մնացած 2 երեխա տեղավորվել է «Զատիկ երեխաների աջակցության» կենտրոն: Ապահովվել է մասնակցությունը 13 դատական նիստերի, որտեղ անհրաժեշտություն է առաջացել որպես երրորդ անձ հանդես գալու և երեխայի կարծիքը լսելու գործընթացում:

Մարզում կազմակերպվել և աջակցվել են երեխաներին նվիրված և նրանց հիմնախնդիրների քննարկմանն ուղղված մի շարք միջոցառումներ: Իրականացվել են ԼՂ-ից բռնի տեղահանված անձանց ընդունման, կարիքների գնահատման և սկզբնական տեղավորման աշխատանքների կազմակերպման աշխատանքները:

Աջակցություն է ցուցաբերվել մարզում գործունեություն իրականացնող հասարակական կազմակերպություններին՝ իրականացնել մարզային ծրագրեր:

Ապահովվել է զոհված զինծառայողների ընտանիքներից 22 անձի մասնակցությունը Հայաստանի Հանրապետության վարչապետի տիկնոջ աշխատակազմի կողմից կազմակերպած միջոցառմանը:

Կազմակերպվել է առավել խոցելի խմբերի դպրոցականների ամառային հանգստը՝ Հանքավանի «Հասմիկ» ճամբարում (շուրջ 200 երեխաներ) և համագործակցելով Հայ օգնության ֆոնդի Հայաստանյան մասնաճյուղի հետ Հանքավանի «Արագած» ճամբարում (20 ծնողազուրկ և Արցախյան 44-օրյա պատերազմում զոհված ընտանիքների երեխաներ):

Տարածքային կառավարման, տեղական ինքնակառավարման, համայնքային ծառայության և հանրապետական գործադիր մարմինների տարածքային ստորաբաժանումների գործունեությանն առնչվող հարցեր

2023 թվականին կազմակերպել են մարզպետի, մարզպետի տեղակալի և մարզպետի աշխատակազմի գլխավոր քարտուղարի մոտ հրավիրված խորհրդակցությունները, ապահովվել համայնքների ղեկավարների և հրավիրված անձանց մասնակցությունը նշված խորհրդակցություններին:

Մշտական կապի մեջ լինելով մարզի տեղական ինքնակառավարման մարմինների հետ նրանց տրամադրել է անհրաժեշտ խորհրդատվություն իրենց սեփական և պետության կողմից պատվիրակված լիազորությունների իրականացման հարցերով, ինչպես նաև վերահսկվել է պետության կողմից համայնքին պատվիրակված լիազորությունների կատարման ընթացքը և պարտադիր լիազորությունների կատարումը:

Մեթոդական աջակցություն և խորհրդատվություն է տրամադրվել մարզի համայնքապետարանների աշխատակազմերին: Շարունակաբար հսկողություն է իրականացվել մարզի համայնքների ավագանու նիստերի հրավիրման

պարբերականության, ավագանու և համայնքների ղեկավարների որոշումները սահմանված կարգով մարզպետի աշխատակազմ ներկայացնելու նկատմամբ և դրանց համապատասխանությունը գործող օրենսդրությանը, ինչպես նաև համայնքներում տեղական ինքնակառավարման մարմինների կողմից քաղաքացիների դիմում-բողքներին, առաջարկություններին, քաղաքացիների ընդունելություններին և նրանց կողմից բարձրացրած հարցերին օրենսդրությամբ սահմանված կարգով ընթացք տալու գործընթացներին:

Հայաստանի Հանրապետության Արմավիրի մարզպետի համապատասխան որոշումով ստեղծված աշխատանքային խումբը 2023 թվականի ընթացքում Հայաստանի Հանրապետության Արմավիրի մարզի՝ Մեծամոր, Փարաքար, Արաքս, Խոյ համայնքներում իրականացրել է իրավական հսկողության աշխատանքներ:

Ապահովվել է մասնակցությունը մարզի համայնքներում համայնքային ծառայության ինչպես նաև ՀՈԱԿ-ների տնօրենների մրցույթային հանձնաժողովների աշխատանքներին: Համայնքային ծառայության թափուր պաշտոններ զբաղեցնելու համար հայտարարվել է 119 մրցույթ: Կայացել է 98 մրցույթ, որոնց մասնակցել է 120 քաղաքացի, հաղթող է ճանաչվել 95 քաղաքացի, որոնք նշանակվել են համապատասխան պաշտոններում, ՀՈԱԿ-ների տնօրենների թափուր պաշտոն զբաղեցնելու համար հայտարարվել է 33 մրցույթ, կայացել է 28 մրցույթ, որոնց մասնակցել է 29 քաղաքացի, հաղթող է ճանաչվել 27 քաղաքացի:

2023 թվականին «Մաստեր Սթայլ» ՍՊԸ-ի հետ համատեղ մարզպետի աշխատակազմի վարչական շենքում կազմակերպվել և անցկացվել են 160 համայնքային ծառայողների հերթական վերապատրաստման դասընթացներ՝ նախորդ տարվա 80 վերապատրաստվողների համեմատ: Վերապատրաստման վկայականներ են ստացել 159 համայնքային ծառայողներ: «Մաստեր Սթայլ» ՍՊԸ հետ համատեղ անցկացվել է նաև տեղական ինքնավարման մարմինների վերապատրաստման դասընթացներ, 50 վերապատրաստվողներից վկայականներ են ստացել 42 ավագանու անդամներ և 2 համայնքների ղեկավարներ:

2023 թվականի ընթացքում ապահովվել է մշտական համագործակցությունը համայնքների ղեկավարների, տարածքային ընտրական հանձնաժողովների, Հայաստանի Հանրապետության ՆԳՆ անձնագրային և վիզաների վարչության Արմավիրի, Վաղարշապատի, Մեծամորի և Բաղրամյանի բաժանմունքների հետ, Հայաստանի Հանրապետության արդարադատության նախարարության պրոբացիոն ծառայության, ինչպես նաև Հայաստանի Հանրապետության ՆԳՆ փրկարար ծառայության Արմավիրի մարզային փրկարարական վարչության հետ: Կազմվել և Հայաստանի Հանրապետության ՆԳՆ «Ճգնաժամային կառավարման պետական ակադեմիա» է ուղարկվել մարզի

կազմակերպությունների, մարզպետի աշխատակազմի, համայնքապետարանների աշխատակազմերի 2024 թվականի ունկնդիրների պլան-գրաֆիկը և մշտական հսկողություն է իրականացվել նրանց կողմից դասընթացների մասնակցությունը:

Ապահովվել է համագործակցությունը Հայաստանի Հանրապետության ՊՆ 2 և 2ՀԾ Արմավիրի մարզի տարածքային ստորաբաժանման հետ, 2023 թվականի ամառային և ծմեռային զորակոչերի կազմակերպման աշխատանքներում: Մշտապես ուշադրության կենտրոնում է պահվել մարզի երեք կազմակերպություններում այլընտրանքային ծառայություն կատարող անձանց աշխատանքային և կենցաղային պայմանների ապահովման և իրենց օրենքով սահմանված կարգով պարտականությունների կատարման ուղղությամբ: Այլընտրանքային ծառայության վերաբերյալ հավաքվել է տեղեկատվություն մարզի չորս համայնքներից և ներկայացվել է Հայաստանի Հանրապետության տարածքային կառավարման և ենթակառուցվածքների նախարարության համապատասխան հանձնաժողովին: Մշտապես ապահովվել է մարզի վարչական տարածքում տեղակայված զորամասերի, մարզի հանրապետական գործադիր մարմինների ստորաբաժանումների և համայնքների միջև կապը և փոխգործակցությունը:

Իրականացվել է Հայաստանի Հանրապետության Արմավիրի մարզի համայնքների պաշտոնական համացանցային կայքերի վարման նկատմամբ մշտադիտարկում:

Հայաստանի Հանրապետության Արմավիրի մարզպետի համապատասխան որոշմամբ ստեղծված աշխատանքային խմբի կազմում ապահովվել է մասնակցություն ԼՂ-ից բռնի տեղահանված մարզի համայնքներում բնակություն հաստատած քաղաքացիների հաշվառման, տեղավորման և բազմաթիվ այլ խնդիրների լուծման աշխատանքներին:

Մարզի 4 քաղաքացիներից ստացվել են դիմումներ ՌԴ մուտքի թույլտվության արգելքը վերացնելու վերաբերյալ, որոնք ուղարկվել են Հայաստանի Հանրապետության ՆԳՆ միգրացիայի և քաղաքացիության ծառայություն, իսկ ստացված պատասխանների և պարզաբանումների մասին տեղեկացվել է դիմումատու քաղաքացիներին:

Զորահավաքային նախապատրաստություն: Կազմակերպվել և համակարգվել են մարզի և աշխատակազմի զորահավաքային նախապատրաստության և քաղաքացիական պաշտպանության աշխատանքները:

Համագործակցելով Հայաստանի Հանրապետության ՊՆ 2 և 2ՀԾ Արմավիրի տարածքային ստորաբաժանման և տեղական ինքնակառավարման մարմինների հետ ապահովվել է զորահավաքային նախապատրաստության, զորահավաքային ռեսուրսների ուսումնասիրման, ճշգրտման աշխատանքներին օժանդակությունը: Տարվել է աշխատակազմի զինապարտ աշխատակիցների հաշվառում և ամրագրում: Սահմանված կարգով վարվել են առկա գրանցամատյանները: Հայաստանի Հանրապետության

կառավարության որոշումների համաձայն կազմակերպվել են վարժական հավաքներում ընդգրկված մարզի զինապարտ քաղաքացիների ծանուցման աշխատանքները: Շարքային կազմի պարտադիր զինվորական ծառայության զորակոչերի ընթացքում նախապատրաստել են մարզային զորակոչային հանձնաժողովի նիստերը և մասնակցել հանձնաժողովի աշխատանքներին: Մարզի համայնքների, վարչական ղեկավարների, դպրոցների տնօրենների, զինղեկների, ավագ դասարանների աշակերտների մասնակցությամբ կազմակերպվել և անցկացվել են հավաք խորհրդակցություններ «Հայաստանի Հանրապետության ՊՆ ռազմաուսումնական հաստատություններում դիմորդների գրավչության բարձրացման» թեմայով: Հայաստանի Հանրապետության պաշտպանության նախարարության համապատասխան ստորաբաժանման և տեղական ինքնակառավարման մարմինների հետ համատեղ մարզի 8 համայնքներում կազմակերպվել և անցկացվել են Հայաստանի Հանրապետության ԶՈՒ-երը և կանանց նորաստեղծ ստորաբաժանումը պայմանագրային զինծառայողներով համալրման աշխատանքներ և իրազեկման հանդիպումներ:

Հայաստանի Հանրապետության ՆԳՆ փրկարար ծառայության Արմավիրի մարզային փրկարարական վարչության հետ համատեղ լրամշակվել հաստատման են ներկայացվել ոլորտին վերաբերելի մի շարք պլաններ: Նախապատրաստվել և անցկացվել են հրամանատարաշտաբային, շտաբային ուսումնավարժանքներ, դասախոսություններ, պատսպարման վայրերի ուսումնասիրություններ և այլն:

Ջարգացման ծրագրերի մշակում և իրականացում

Սուբվենցիոն ծրագրեր: 2023թ. ընթացքում աջակցություն է ցուցաբերվել համայնքներին սուբվենցիաներ ստանալու նպատակով հայտերի մշակման, սահմանված կարգով Հայաստանի Հանրապետության ՏԿԵՆ ներկայացման և ծրագրերի իրականացման ողջ ընթացքում, ուշադրության կենտրոնում են եղել նախորդ տարիների չավարտված և շարունակվող սուբվենցիոն ծրագրերը: Մարզի սուբվենցիոն ծրագրերի ընթացքի վերաբերյալ համապատասխան տեղեկատվությունը, ծրագրերի իրականացման ընթացքը լուսաբանող լուսանկարները պարբերաբար հրապարակվել են մարզպետի աշխատակազմի պաշտոնական կայքում և ֆեյսբուքյան էջում: Մարզպետի և մշտադիտարկման աշխատանքային խմբի անդամների կողմից պարբերաբար այցելություններ են կատարվել համայնքներ՝ շինարարական աշխատանքների ընթացքի նկատմամբ հսկողություն իրականացնելու նպատակով:

2023 թվականի ընթացքում Հայաստանի Հանրապետության կառավարության 12 որոշումներով Հայաստանի Հանրապետության Արմավիրի մարզպետի աշխատակազմին սուբվենցիոն ծրագրերի պետական բյուջեի հատկացումը կազմում է ընդամենը

2,606,287,500 ՀՀ դրամ (7 միավորված համայնքների 63 բնակավայրերի 118 ենթածրագրերի համար): Ցուցանիշը գերազանցում է 2022թ. ցուցանիշը՝ 1 մլրդ 138 մլն դրամով:

Համայնքապետարանների կողմից Հայաստանի Հանրապետության Արմավիրի մարզպետի աշխատակազմ ներկայացված օրենսդրությամբ նախատեսված ծախսը հիմնավորող փաստաթղթերի հիման վրա 2023թ. դեկտեմբերի 29-ի դրությամբ կատարվել է պետության մասնաբաժնի ֆինանսավորում՝ 2,603,296,314 ՀՀ դրամ, կատարողականը կազմել է 99.89%-ով:

2024թ. համար Հայաստանի Հանրապետության տարածքային կառավարման և ենթակառուցվածքների նախարարություն է ներկայացվել 37 սուբվենցիոն ծրագրի ամբողջական փաթեթ՝ շուրջ 11մլրդ. դրամ ընդհանուր արժեքով, որը ներկայացվել է մարզի 7 միավորված համայնքների կողմից և վերաբերում է 59 բնակավայրերին՝ 139 ենթածրագրերով, որից՝

պետական բյուջեի մասնաբաժինը՝ 5,3մլրդ ՀՀ դրամ,
համայնքային բյուջեի մասնաբաժինը՝ 5,7 մլրդ ՀՀ դրամ,
մասնավորի և բնակիչների ներդրումը՝ 21,76 մլն ՀՀ դրամ:

Արտաքին կապեր: 2023թ. ընթացքում մարզի տնտեսության զարգացմանը նպաստող ներդրումային հնարավորությունների բացահայտման, մարզում հնարավոր ներդրողների ներգրավման և մարզի սոցիալ-տնտեսական զարգացմանը նպաստող համատեղ ծրագրեր իրականացնելու նպատակով արտաքին կապերի բնագավառում շարունակվել է համագործակցությունը նախկինում հաստատված կապերով և նոր կապեր ու համագործակցություններ սկսելու համար գործուն քայլեր են ձեռնարկվել: Մարզային մակարդակում հատկապես ակտիվ է եղել համագործակցությունը ԳԴՀ Բուրգենլանդի շրջանի, Չեխիայի Հանրապետության Մորավյան-Սիլեզյան երկրամասի, Ռումինիայի Կլուժ նահանգի, ՌԴ Վոլոգդայի նահանգի միջև: Կայացել են հանդիպումներ մարզպետի և Հայաստանում Չեխիայի արտակարգ և լիազոր դեսպանի, Հայաստանի Հանրապետությունում Ֆրանսիայի նորանշանակ դեսպանի, Հայաստանում Բելառուսի Հանրապետության արտակարգ և լիազոր դեսպանի հետ: Դեսպանների հետ հանդիպումների ընթացքում կողմերը քննարկել են վարչական միավորների միջև առկա հարաբերությունները զարգացնելուն և նոր կապեր հաստատելուն վերաբերող հարցեր:

Տարվա ընթացքում աշխատանքներ են տարվել համագործակցության նոր կապեր ստեղծելու և նոր հուշագրեր ստորագրելու ուղղությամբ: Համայնքային մակարդակում ձևավորվել են նոր համագործակցություններ, մասնավորապես՝

–2023 թվականի հուլիսի 21-ին ՌԴ Իրկուտսկ քաղաքում Հայաստանի Հանրապետության Ազգային ժողովի և ՌԴ Դաշնային ժողովի միջև համագործակցության Միջխորհրդարանական հանձնաժողովի 37-րդ նիստի շրջանակում Արմավիր և Իրկուտսկ համայնքների միջև կնքվել է համագործակցության հուշագիր,

–2023 թվականի հոկտեմբերի 7-ին Էջմիածին և Բեթլեհեմ քաղաքների միջև կնքվել է քույր քաղաքների համաձայնագիր:

Ջրոսաշրջություն: Մարզում կան բոլոր հնարավորությունները հոգևոր-մշակութային, գյուղական, ագրո և էնո տուրիզմի զարգացման համար՝ զբոսաշրջությունը դարձնելով մարզի տնտեսության զարգացման հիմնական շարժիչ ուժերից մեկը: Համագործակցելով Հայաստանի Հանրապետության Էկոնոմիկայի նախարարության զբոսաշրջության կոմիտեի հետ համատեղ աշխատանքի արդյունքում ստեղծվել է մարզի զբոսաշրջային գրավչությունները ներկայացնող եռալեզու սահիկաշար մարզի ճանաչելիությանը միտված տարաբնույթ միջոցառումների ժամանակ օգտագործելու նպատակով:

Ապահովվել է մարզի բոլոր համայնքների պատշաճ մասնակցությունը Երևանի Խաչքարերի պուրակում 2023 թվականի մայիսի 27-ից 28-ը կազմակերպված «Ճանաչիր Հայաստանը» մարզային զբոսաշրջային ցուցահանդեսին: «Արևահամ Արմավիր» կարգախոսով մարզային տաղավարում երկու օր ներկայացվել է մարզի արտադրանքը, ստեղծագործող վարպետների աշխատանքները, մարզի բերք ու բարիքը, հարուստ պատմամշակութային ժառանգությունը:

Հայաստանի Հանրապետության Արմավիրի մարզպետի աշխատակազմում քննարկվել և հավանության է արժանացել ««Զբոսաշրջային կենտրոն» հայտարարելու մասին» Հայաստանի Հանրապետության կառավարության որոշման նախագիծը, համաձայն որի՝ Հայաստանի Հանրապետության զբոսաշրջության ոլորտում ձևավորվող 20 կլաստերների ցանկում է նաև «Արմավիր» կլաստերը: Ծրագիրը նոր հնարավորություն է զբոսաշրջային ենթակառուցվածքների զարգացման համար, որը նախատեսում է արդյունքներ գրանցել 10 տարվա ընթացքում:

Հայաստանի Հանրապետության Արմավիրի մարզպետի աշխատակազմի հետ համագործակցության արդյունքում Հայաստանի Հանրապետության կառավարության «Արձակուրդը Հայաստանում» ծրագրի շրջանակներում լուսաբանվել են մարզի տպավորիչ և հյուրընկալ հասցեներ Փարաքար, Բամբակաշատ և Փշատավան բնակավայրերում:

Հայաստանի Հանրապետության Արմավիրի մարզպետի աշխատակազմի և համայնքապետարանների հետ համագործակցության արդյունքում «Face Control Travel/Ֆեյս Բընթրոլ ճանապարհորդություն» հաղորդաշարը լուսաբանել է Վաղարշապատ, Մեծամոր և Խոյ համայնքների մի շարք զբոսաշրջային գրավչություններ: Մարզի այլ համայնքների մասով աշխատանքները շարունակվում են:

23.10.2023թ. Հայաստանի Հանրապետության կառավարության համապատասխան որոշմամբ ԿԳՄՍ նախարարության պատվիրատվությամբ հատկացվել է 1 մլն 608 հազար ՀՀ դրամ՝ Արմավիրի մարզի Շուշանավանքի նորոգման, ամրակայման և վերականգնման գիտանախագծային փաստաթղթերի համար:

Մարզպետի աշխատակազմի գործունեության կազմակերպման ընդհանուր հարցեր

Ղեկավարվելով Հայաստանի Հանրապետության օրենսդրությամբ, արդյունավետ աշխատանքներ են կատարվել մարզպետի աշխատակազմում ներքին գործավարության վարման, փաստաթղթերի ընդունման, օպերատիվ հաշվառման և տնօրինման միասնական համակարգի պահպանման, մարզպետի աշխատակազմի կարիքների համար 2023թ. պետական բյուջեով նախատեսված և համապատասխան ծախսային ծրագրերի իրականացման նպատակով գնվելիք ապրանքների, աշխատանքների և ծառայությունների անվանացանկում ընդգրկված ապրանքանյութական արժեքների ձեռքբերման, հաշվառման, մարզպետի աշխատակազմին ամրացված անշարժ գույքի նկատմամբ գույքային իրավունքների պաշտպանության և այդ գույքի արդյունավետ օգտագործմանն ուղղված միջոցառումների, մարզպետի աշխատակազմի վարչական շենքի կոմունալ ծառայությունների տեխնիկական, ինչպես նաև տրանսպորտային սպասարկման ապահովման ուղղությամբ:

2023թ. մուտքագրվել է ընդհանուր քանակով 25725 և առաքվել 9527 փաստաթուղթ, տարաբնույթ հարցերի կապակցությամբ ընդունվել են մարզպետի 1003 որոշումներ:

Մարզպետի աշխատակազմ առաջարկություններով, դիմումներով և բողոքներով քաղաքացիների դիմելը դիտարկելով որպես անձի իրավունքների իրականացման և պահպանման, բնակչության հետ մարզպետի աշխատակազմի կապերի ամրապնդման կարևորագույն միջոց, հետևողական աշխատանքներ են տարվել օրենսդրությամբ սահմանված կարգով ու ժամկետներում քաղաքացիների առաջարկությունները, դիմումներն ու բողոքները քննության առնելու, օրենսդրությանը համապատասխան դրանցում արժարժված խնդիրների լուծումն ապահովելու և պատասխանելու նպատակով անհրաժեշտ միջոցներ ձեռնարկելու ուղղությամբ, ստացվել են քաղաքացիների ընդհանուր թվով 2435 տարաբնույթ դիմումներ, որոնց գերակշիռ մասին (2406) օրենսդրությամբ սահմանված կարգով տրվել են համապատասխան լուծումներ: Նշված 2406 նամակներից 767-եղել է դրամական աջակցության խնդրանքով, որոնք ստացել են դրական լուծումներ: Հայաստանի Հանրապետության Արմավիրի մարզպետի մոտ կազմակերպված ընդունելություններին գրանցված 57 քաղաքացիներից ընդունելություններին մասնակցել են 51 քաղաքացիներ (հերթագրված 6 քաղաքացիներ

չեն ներկայացել ընդունելություններին), որոնց կողմից բարձրացված հարցադրումներից դրական լուծում են ստացել 26-ը, օրենսդրությանը համապատասխան սպառիչ պարզաբանումներ են ստացել 25-ը: Կայացել և արձանագրվել են Հայաստանի Հանրապետության Արմավիրի մարզի խորհրդի 4 հերթական և 1 արտահերթ նիստեր և 2 խորհրդակցություններ:

Անձնակազմի կառավարում: 2023թ. ՀՀ Արմավիրի մարզպետի աշխատակազմի հաստիքային միավորների թիվն 96 է, քաղաքացիական ծառայողների հաստիքների թիվը՝ 75:

Հայաստանի Հանրապետության վարչապետի 2022 թվականի դեկտեմբերի 29-ի թիվ 1550-Լ որոշումն ուժի մեջ մտնելուց հետո՝ ապահովվել է «Հայաստանի Հանրապետության Արմավիրի մարզպետարանի աշխատակազմ» պետական կառավարչական հիմնարկը հաշվառումից հանելու և «Հայաստանի Հանրապետության Արմավիրի մարզպետի աշխատակազմ» պետական մարմինը հաշվառելու գործընթացը: 20.03.2023թ. հաստատվել են Հայաստանի Հանրապետության Արմավիրի մարզպետի աշխատակազմի կառուցվածքային ստորաբաժանումների կանոնադրությունները: 2023թ. հունիսի 28-ին ավարտվել է վերակազմակերպման ամբողջ գործընթացը՝ համապատասխան կառուցվածքային փոփոխություններով և վերանշանակումներով:

2023թ. քաղաքացիական ծառայության 11 պաշտոն համալրելու նպատակով Աշխատակազմում հայտարարվել է 11 մրցույթ՝ 3 արտաքին, 8 ներքին: Մինչև 3 տարեկան երեխայի խնամքի արձակուրդում գտնվող քաղաքացիական ծառայողների ժամանակավոր թափուր պաշտոնները համալրելու նպատակով հայտարարվել է 6 մրցույթ: Մրցույթների արդյունքում հաղթող ճանաչված անձինք նշանակվել են համապատասխան պաշտոններում:

Միաժամանակ 3 անգամ հայտարարվել և անցկացվել է մրցույթ «Արմավիրի Զարիշատ (Արամ) Մարտինի Մկրտչյանի անվան բժշկական կենտրոն» ՓԲԸ տնօրենի թափուր պաշտոնն զբաղեցնելու համար, որոնցից 2-ի արդյունքում հաղթող չի ճանաչվել: Հայտարարվել և անցկացվել է նաև «Մեծամորի բժշկական կենտրոն» ՓԲԸ տնօրենի թափուր պաշտոնն զբաղեցնելու համար մրցույթը: Մրցույթների արդյունքում հաղթող ճանաչված անձինք նշանակվել են համապատասխան պաշտոններում:

Քաղաքացիական ծառայության մասին Հայաստանի Հանրապետության օրենսդրությամբ սահմանված կարգով իրականացվել են մարզպետի աշխատակազմի քաղաքացիական ծառայողների վերապատրաստման կազմակերպման աշխատանքները, որի արդյունքում 2023թ. վերապատրաստման գործընթացն ամբողջությամբ իրականացվել է: Հայաստանի Հանրապետության Արմավիրի մարզպետի աշխատակազմում 2023թ. ընթացքում ծառայողական քննություն չի իրականացվել:

Փոփոխության են ենթարկվել մարզպետի աշխատակազմի 17 քաղաքացիական ծառայողների դրույքաչափերը: Ապահովվել է Մարզպետի աշխատակազմում ուսումնական հաստատության թվով 11 ուսանողի պրակտիկայի կազմակերպումը:

Պետական ոչ առևտրային կազմակերպության տնօրենի նշանակման նախկին կարգին համապատասխան՝ 2023թ. հունվարի 1-ից մինչև նոր կարգի ուժի մեջ մտնելը, պաշտոնի է նշանակվել պետական ոչ առևտրային կազմակերպության 9 տնօրեն: Պետական ոչ առևտրային կազմակերպության տնօրենի և վարչատնտեսական մասի համակարգողի թափուր պաշտոններն զբաղեցնելու համար 2023թ. ուժի մեջ մտած նոր կարգի համաձայն, հայտարարվել են համապատասխանաբար՝ 56 և 92 մրցույթներ: Մրցույթների արդյունքում պաշտոնի է նշանակվել՝ 4 տնօրեն և 6 վարչատնտեսական մասի համակարգող:

Տեղեկատվության և հասարակայնության հետ կապեր: Ակտիվ աշխատանքներ են տարվել մարզի տեղեկատվական քաղաքականության իրականացման և մարզպետի աշխատակազմի պաշտոնական կայքի վարման ուղղությամբ:

Ապահովվել է Հայաստանի Հանրապետության Արմավիրի մարզպետի, մարզպետի աշխատակազմի գործունեության վերաբերյալ հասարակության իրազեկումը մարզպետի աշխատակազմի պաշտոնական կայքի, ֆեյսբուքյան էջի, ինչպես նաև ԶԼՄ հարթակներով տարածելու միջոցով: Առանձին դեպքերում ապահովվել է նաև համայնքապետարաններին և մարզպետի աշխատակազմի ենթակայությամբ գործող կրթական ու առողջապահական հաստատություններին վերաբերող տեղեկությունների լուսաբանումը: Օրենսդրությամբ սահմանված կարգով և ժամկետներում պատասխանվել են լրատվամիջոցներից, հասարակական կազմակերպություններից ստացված գրավոր, ինչպես նաև ֆեյսբուքյան հարթակում գրանցված առցանց հարցումներին:

Ապահովվել է նաև (տվյալ դեպքում միայն Հայաստանի Հանրապետության Արմավիր մարզպետի աշխատակազմի կայքում) համայնքների ղեկավարների և ավագանու որոշումների, համայնքային բյուջետային եկամուտների ու ծախսերի, համայնքների ղեկավարների կիսամյակային հաշվետվությունների և համայնքներում իրականացված վարչական և մասնագիտական հսկողության ակտերի ու դրանցում արձանագրված խախտումների վերջման վերաբերյալ տեղեկանքների, ինչպես նաև համայնքներին վերաբերող այլ նյութերի հրապարակումը: Աջակցություն է ցուցաբերվել Համայնքային կառավարման տեղեկատվական համակարգի շահագործման և «Mulberry» էլեկտրոնային փաստաթղթաշրջանառության համակարգի միջև փոխգործակցության ապահովման, ինչպես նաև համայնքապետարաններում պաշտոնական կայքերի ներդրման և վարման աշխատանքներին:

Ակտիվ աշխատանքներ են տարվել նաև մարզպետի աշխատակազմում առկա արխիվային փաստաթղթերի ընթացիկ մշակման, արխիվային ֆոնդի գործերի և համապատասխան փաստաթղթերի սահմանված կարգով մարզպետի աշխատակազմի արխիվ հանձնման, ընդունման, հաշվառման, պահպանման, մատչելիության ապահովման, դրանց հիմքերի մշակման և հետագայում պետական արխիվային պահպանության հանձնելու ուղղությամբ:

Իրավական հարցեր: 2023թ. ընթացքում մարզպետի կողմից ընդունվել է 1033 որոշում, որոնք ներկայացվել են Հայաստանի Հանրապետության տարածքային կառավարման և ենթակառուցվածքների նախարարություն և դրանց նկատմամբ իրավական հսկողության արդյունքում գնահատվել են իրավաչափ: Օրենսդրական տեխնիկայի կանոնների կիրառման իրազեկման ուղղությամբ պարբերաբար համայնքներ, մարզային ենթակայության հանրակրթական ուսումնական, ինչպես նաև բժշկական հաստատություններ են ներկայացվել մեթոդական շրջաբերական գրություններ: Մարզպետի աշխատակազմ ներկայացված տարբեր ոլորտներին վերաբերող նորմատիվ իրավական ակտերի նախագծերի վերաբերյալ մշակվել և ներկայացվել են հիմնավորված առաջարկություններ, որոնք իրատեսական են գնահատվել և իրենց ուրույն տեղ են գտել շրջանառվող նախագծերում:

Հայաստանի Հանրապետության Արմավիրի մարզի խորհուրդը ի գիտություն ընդունեց Հայաստանի Հանրապետության Արմավիրի մարզպետ Դավիթ Խուդաթյանի կողմից ներկայացված Հայաստանի Հանրապետության Արմավիրի մարզի 2023 թվականի սոցիալ-տնտեսական վիճակի և մարզպետի գործունեության մասին հաշվետվությունը:

Օրակարգային՝ << Հայաստանի Հանրապետության Արմավիրի մարզի Խոյ համայնքում 2023 թվականի չորրորդ եռամսյակի ընթացքում իրականացված իրավական և մասնագիտական հսկողության արդյունքների և 2024 թվականին իրականացվելիք մարզի տեղական ինքնակառավարման մարմինների լիազորությունների իրականացման նկատմամբ իրավական և մասնագիտական հսկողության աշխատանքային ծրագրի մասին >> երրորդ հարցի կապակցությամբ զեկուցմամբ հանդես եկավ Հայաստանի Հանրապետության Արմավիրի մարզպետի աշխատակազմի իրավաբանական բաժնի պետ Լիաննա Հարությունյանը: Նա նիստի մասնակիցներին իրազեկեց, որ Հայաստանի Հանրապետության տարածքային կառավարման և ենթակառուցվածքների նախարարի 2022 թվականի նոյեմբերի 30-ի N 3245-Ա հրամանով հաստատված տեղական ինքնակառավարման մարմինների

լիազորությունների իրականացման նկատմամբ իրավական և մասնագիտական հսկողության 2023 թվականի աշխատանքային ծրագրի համաձայն, Հայաստանի Հանրապետության Արմավիրի մարզպետի 2023 թվականի հոկտեմբերի 23-ի N ՄՈ/621-Ա որոշմամբ ստեղծված աշխատանքային խմբի կողմից Հայաստանի Հանրապետության Արմավիրի մարզի Խոյ համայնքում 2023 թվականի չորրորդ եռամսյակում իրականացվել է իրավական հսկողություն, որի արդյունքում կազմված համապատասխան փաստաթղթերը՝ արձանագրությունը և հարցաշարը, սահմանված կարգով և ժամկետներում հրապարակվել են Հայաստանի Հանրապետության Արմավիրի մարզպետի աշխատակազմի պաշտոնական կայքէջում՝ <http://armavir.mtad.am/>, ինչպես նաև ներկայացվել են Հայաստանի Հանրապետության տարածքային կառավարման և ենթակառուցվածքների նախարարություն:

Աշխատանքային խմբի կողմից իրավական հսկողությունն իրականացվել է «Տեղական ինքնակառավարման մասին», «Վարչարարության հիմունքների և վարչական վարույթի մասին», ինչպես նաև «Հայաստանի Հանրապետությունում ստուգումների կազմակերպման և անցկացման մասին» Հայաստանի Հանրապետության օրենքներով սահմանված կարգով:

Աշխատանքային խմբի կողմից ցուցաբերած մեթոդական աջակցության արդյունքում 2023 թվականի դեկտեմբերի 14-ին Խոյ համայնքի ավագանու կայացած նիստով հաստատվել են որոշ կարգեր, կանոններ, այդ թվում նաև սխեմաներ, որոնք Հայաստանի Հանրապետության գործող օրենսդրությամբ նախատեսված պահանջներ են և, որոնք ապահովում են ոլորտային աշխատանքների համակարգված գործունեությունը:

Աշխատանքային խմբի կողմից իրականացված իրավական հսկողության արդյունքներով, որպես արձանագրված խախտում, ամբողջությամբ վճարվել է Խոյի համայնքապետարանի աշխատակազմի այն համայնքային ծառայողների հավելավճարները, ովքեր ունեն համայնքային ծառայության իրենց զբաղեցրած պաշտոնի ենթախմբին համապատասխանող դասային աստիճանից բարձր դասային աստիճան: Նշված աշխատակիցների թիվն ըստ համայնքի ղեկավարի կողմից Հայաստանի Հանրապետության Արմավիրի մարզպետի աշխատակազմ ներկայացված տեղեկատվության 12-ն են:

Նշվեց նաև, որ ընդհանուր վերլուծության արդյունքում մարզի համայնքներում, որպես համայնքային ծառայության իրենց զբաղեցրած պաշտոնի ենթախմբին համապատասխանող դասային աստիճանից բարձր դասային աստիճան ունեցող համայնքային ծառայողների ընդհանուր թիվը կազմում է 70 (Արմավիր՝ 8, Մեծամոր՝ 28, Վաղարշապատ՝ 1, Արաքս՝ 7, Խոյ՝ 12, Փարաքար՝ 5 և Բաղրամյան՝ 9):

Հայաստանի Հանրապետության տարածքային կառավարման և ենթակառուցվածքների նախարարի 2023 թվականի նոյեմբերի 30-ի N 2530-Ա հրամանով հաստատվել է տեղական ինքնակառավարման մարմինների լիազորությունների իրականացման նկատմամբ իրավական և մասնագիտական հսկողության 2024 թվականի աշխատանքային ծրագիրը և հաշվի առնելով նախարարի նաև 2024 թվականի հունվարի 24-ի N ԳՍ/20.1/2338-2024 գրությունը՝ Հայաստանի Հանրապետության Արմավիրի մարզում հսկողության ժամկետները սահմանված են 1-3-րդ եռամսյակներում՝ համապատասխանաբար՝ Բաղրամյան, Վաղարշապատ և Արմավիր համայնքներում:

Ձեկուցման կապակցությամբ Հայաստանի Հանրապետության Արմավիրի մարզպետ Դավիթ Խուդաթյանը հավաստեց, որ նման խնդիրներ ունեն նաև մարզի Արմավիր, Մեծամոր, Վաղարշապատ, Արաքս, Փարաքար և Բաղրամյան համայնքները, որն, իհարկե, անընդունելի է: Մարզպետը վերը նշված համայնքների ղեկավարներին առաջարկեց՝ Հայաստանի Հանրապետության օրենսդրությանը համապատասխան ամբողջությամբ վճարել այն համայնքային ծառայողների հավելավճարները, ովքեր ունեն համայնքային ծառայության իրենց զբաղեցրած պաշտոնի ենթախմբին համապատասխանող դասային աստիճանից բարձր դասային աստիճան, որի արդյունքում անկասկած որոշակիորեն կբարձրանա նրանց աշխատանքի արդյունավետությունը:

Օրակարգային՝ << Հայաստանի Հանրապետության ֆինանսների նախարարության ֆինանսաբյուջետային վերահսկողության վարչության կողմից մարզի համայնքապետարաններում պետական բյուջեից տրամադրված բյուջետային միջոցների նկատմամբ ֆինանսական, այդ թվում ստուգումների միջոցով անհրաժեշտ վերահսկողության կազմակերպման արդյունքների մասին >> չորրորդ հարցի կապակցությամբ զեկուցմամբ հանդես եկավ Հայաստանի Հանրապետության Արմավիրի մարզպետի աշխատակազմի քաղաքաշինության, հողաշինության և ենթակառուցվածքների կառավարման վարչության պետի պարտականությունները կատարող Խորեն Սարուխանյանը: Նա իր զեկուցմամբ նշեց, որ Հայաստանի Հանրապետության վարչապետի 2022 թվականի նոյեմբերի 30-ի «Հայաստանի Հանրապետության պետական բյուջեի կատարման նկատմամբ հսկողության 2023 թվականի ծրագիրը հաստատելու մասին» N 1414-Ա որոշմամբ հաստատված ծրագրի և «Տարածքային զարգացում» և «Հայաստանի Հանրապետության կառավարության պահուստային ֆոնդ» բյուջետային ծրագրերի «Հայաստանի Հանրապետության մարզերին սուբվենցիաների տրամադրում՝ ենթակառուցվածքների զարգացման նպատակով» միջոցառման շրջանակում Հայաստանի Հանրապետության Արմավիրի մարզի թվով 5 համայնքապետարաններում Հայաստանի Հանրապետության ֆինանսների

նախարարության բյուջետային վերահսկողության վարչության կողմից իրականացված ստուգումների արդյունքում՝ արձանագրվել է 56,410.7 հազ. դրամի խախտումներ, որից ենթակա է վերականգման 28,441.1 հազ. դրամ (13,648.9 հազ. դրամ Հայաստանի Հանրապետության պետական բյուջե և 14,792.2 հազ. դրամ համապատասխան համայնքային բյուջեներ), մասնավորապես՝

Մեծամորի համայնքապետարանում ստուգման ենթարկված թվով 6 Ծրագրերի գծով արձանագրվել է 11,145.5 հազ. դրամի խախտումներ (5,641.4 հազ. դրամ ՀՀ պետական բյուջե և 5,504.1 հազ. դրամ համայնքային բյուջե), որից՝

–հսկիչ չափագրմամբ՝ 2,139.5 հազ. դրամ,

–փաստաթղթային ստուգմամբ՝ 9,006.0 հազ. դրամ,

Արաքսի համայնքապետարանում ստուգման ենթարկված թվով 4 Ծրագրերի գծով արձանագրվել է 6,914.7 հազ. դրամի խախտումներ (3,441.7 հազ. դրամ ՀՀ պետական բյուջե և 3,473.0 հազ. դրամ համայնքային բյուջե), որից՝

–հսկիչ չափագրմամբ՝ 4,057.4 հազ. դրամ,

–փաստաթղթային ստուգմամբ՝ 2,857.3 հազ. դրամ,

Խոյի համայնքապետարանում ստուգման ենթարկված թվով 3 Ծրագրերի գծով արձանագրվել է 1,615.4 հազ. դրամի խախտումներ (305.5 հազ. դրամ ՀՀ պետական բյուջե և 1,309.9 հազ. դրամ համայնքային բյուջե), որից՝

–հսկիչ չափագրմամբ՝ 470.0 հազ. դրամ,

–փաստաթղթային ստուգմամբ՝ 1,145.4 հազ. դրամ,

Փարաքարի համայնքապետարանում ստուգման ենթարկված թվով 4 Ծրագրերի գծով արձանագրվել է 36,735.0 հազ. դրամի խախտումներ (4,380.7 հազ. դրամ ՀՀ պետական բյուջե և 4,625.5 հազ. դրամ համայնքային բյուջե), որից՝

–հսկիչ չափագրմամբ՝ 5,402.0 հազ. դրամ,

–փաստաթղթային ստուգմամբ՝ 31,333.0 հազ. դրամ, որից՝ չվերականգնվող գումար՝ 27,728.8 հազ. դրամ, իսկ 3,604.2 հազ. դրամը՝ վերականգնման ենթակա գումար:

Բաղրամյանի համայնքապետարանին հատկացված գումարների ծախսման ճշտության ստուգման արդյունքներով խախտումներ չեն հայտնաբերվել:

Միաժամանակ նշվեց, որ նույն հարցը քննարկվել է նաև 2023 թվականի դեկտեմբերի 22-ին կայացած մարզի խորհրդի նիստում, որի արձանագրությունը, համապատասխան առաջարկությամբ, ուղարկվել է վերը նշված համայնքներին արձանագրված խախտումներն ու թերությունները վերացնելու նպատակով:

Զեկուցման կապակցությամբ կայացած քննարկման արդյունքներով **Հայաստանի Հանրապետության Արմավիրի մարզպետ Դավիթ Խուդաթյանը Հայաստանի Հանրապետության Արմավիրի մարզի Մեծամոր, Արաքս, Խոյ և Փարաքար**

համայնքների ղեկավարներին առաջարկեց՝ Մեծամորի, Արաքսի, Խոյի և Փարաքարի համայնքապետարաններում քննարկման առարկա դարձնել ստուգման ակտերով արձանագրված խախտումները և բացթողումները, անհրաժեշտ և գործուն միջոցներ ձեռնարկել արձանագրված խախտումներն ու թերությունները հետագայում բացառելու ուղղությամբ, մասնավորապես՝

- յուրաքանչյուր Ծրագրի գծով կոնկրետ նախագծող, տեխնիկական, հեղինակային հսկողություն իրականացնող և կապալառու կազմակերպությունների հետ քննարկել արձանագրված խախտման փաստերը և համապատասխան միջոցներ ձեռնարկել արձանագրված գումարները Հայաստանի Հանրապետության պետական և Համայնքների բյուջեներ վերականգնման ուղղությամբ,

- հսկողություն սահմանել տեխնիկական հսկողություն իրականացնող կազմակերպությունների կողմից օրենքով իրենց վերապահված լիազորությունների շրջանակներում իրականացվող գործառույթների պատշաճ կատարման նկատմամբ, թույլ չտալ աշխատանքների ծավալային հավելագրումների և անորակ աշխատանքների փաստեր,

- հսկողություն սահմանել հեղինակային հսկողություն իրականացնող կազմակերպությունների կողմից օրենքով իրենց վերապահված լիազորությունների շրջանակներում իրականացվող գործառույթների պատշաճ կատարման նկատմամբ, թույլ չտալ օրենքով սահմանված չափերից ավելի նախագծային փոփոխությունների և ծավալային համադրումների փաստեր,

- 15-օրյա ժամկետում Հայաստանի Հանրապետության Արմավիրի մարզպետի աշխատակազմ ներկայացնել տեղեկատվություն ձեռնարկված միջոցառումների և արդյունքների վերաբերյալ:

Այնուհետև, օրակարգում ընդգրկված << 2024 թվականի ընթացքում շարունակվող Հայաստանի Հանրապետության Արմավիրի մարզի համայնքների տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերի ընթացքի և իրականացվելիք աշխատանքների մասին>> հայտարարությամբ հանդես եկավ Հայաստանի Հանրապետության Արմավիրի մարզպետի աշխատակազմի զարգացման ծրագրերի մշակման և իրականացման բաժնի պետ Լիլիթ Մուշեղյանը: Նա իր հայտարարությամբ մասնավորապես նշեց, որ 2024 թվականի ընթացքում Արմավիրի մարզպետի աշխատակազմում համայնքների տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերի մասով իրականացվելու են հետևյալ աշխատանքները.

1) 2022, 2023 թվականներին հաստատված, շինարարական աշխատանքները չավարտված կամ չսկսված սուբվենցիոն ծրագրերի իրականացում

2022թ. հաստատված 41 սուբվենցիոն ծրագրերի 147 ենթածրագրերից ավարտվել են ավարտվել են 110 ենթածրագրեր, 2024 թվական են տեղափոխվել 37 ենթածրագրեր, որից՝ 3-ը ֆինանսավորման մասով, 11-ը՝ և շինարարության, և ֆինանսավորման մասով, և չսկսված 23-ը ենթածրագրեր:

Հայաստանի Հանրապետության կառավարության 28.12.2023թ. N 2340-Ա որոշմամբ թուլատրվել է 2022 թվականին հավանության արժանացած, ընթացքի մեջ գտնվող ծրագրերի, ինչպես նաև 2023 թվականին հավանության արժանացած սուբվենցիոն ծրագրերի իրականացման համար համայնքների հետ կնքված սուբվենցիայի տրամադրման մասին պայմանագրերում և համապատասխան շինարարական աշխատանքների, դրանց կատարման նկատմամբ տեխնիկական և հեղինակային հսկողության ծառայությունների գնման պայմանագրերում կատարել փոփոխություններ՝ պայմանագրերի գործողության ժամկետ սահմանելով **մինչև 2024 թվականի նոյեմբերի 1-ը**՝ չկիրառելով Հայաստանի Հանրապետության կառավարության 2017 թվականի մայիսի 4-ի N 526-Ն որոշման N 1 հավելվածի 56-րդ կետի 4-րդ ենթակետի պահանջները:

Լրացուցիչ տեղեկացվեց, որ որոշմամբ 2024 թվական են տեղափոխվել 2022 թվականի թվով 14 և 2023 թվականի հավանության արժանացած և մինչև 2023 թվականի տարեվերջ չավարտված ենթածրագրերը՝ թվով 88 (145 ենթածրագրերից ավարտվել է 57-ը):

Դեռևս շինարարական աշխատանքները չսկսված 2022 թվականի սուբվենցիոն ծրագրերի համար անհրաժեշտ է ղեկավարվել Հայաստանի Հանրապետության կառավարության 2017 թվականի մայիսի 4-ի «Գնումների գործընթացի կազմակերպման կարգը հաստատելու և Հայաստանի Հանրապետության կառավարության 2011 թվականի փետրվարի 10-ի N 168-Ն որոշումն ուժը կորցրած ճանաչելու մասին» N 526-Ն որոշմամբ սահմանված կարգով, **բացառությամբ այն ծրագրերի, որոնց համար սահմանված կարգով կնքվել են համաձայնագրեր:**

Հայաստանի Հանրապետության Արմավիրի մարզպետի 29.12.2023թ. N 01/16/09521-2023 շրջաբերական գրությամբ վերոգրյալ որոշումն ուղարկվել է մարզի համայնքապետարաններ, և առաջարկվել համապատասխան ենթածրագրերի իրականացման համար կնքված շինարարական աշխատանքների, դրանց կատարման նկատմամբ տեխնիկական և հեղինակային հսկողության ծառայությունների գնման պայմանագրերում կատարել փոփոխություններ՝ կնքելով պայմանագրերի գործողության ժամկետի երկարաձգման համաձայնագրեր՝ ժամկետ սահմանելով **մինչև 2024 թվականի նոյեմբերի 1-ը:** Եվ աղյուսքում, կնքված համաձայնագրերը ներկայացնել Հայաստանի Հանրապետության Արմավիրի մարզպետի աշխատակազմ: Նշված աշխատանքներն ընթացքի մեջ են:

Ծրագրերի ֆինանսավորում. 2024թ. ընթացքում Հայաստանի Հանրապետության կառավարության 01.02.2024թ. N 169-Ն որոշմամբ Հայաստանի Հանրապետության Արմավիրի մարզպետի աշխատակազմին հատկացվել է 262,303,600 ՀՀ դրամ (4 համայնքի 6 բնակավայրի 6 ենթածրագրի պետական բյուջեի մասնաբաժնի ֆինանսավորման համար), կատարված շինարարական աշխատանքների որակի և համապատասխանության մշտադիտարկման արդյունքների և համայնքապետարանների կողմից Հայաստանի Հանրապետության Արմավիրի մարզպետի աշխատակազմ ներկայացված օրենսդրությամբ նախատեսված ծախսը հիմնավորող փաստաթղթերի ուսումնասիրությունից հետո առաջիկայում կկատարվեն ծրագրերի ֆինանսավորման աշխատանքները:

2) 2024 թվականի սուբվենցիոն ծրագրերի իրականացում

2024 թվականին սուբվենցիաներ ստանալու նպատակով ընդհանուր առմամբ Հայաստանի Հանրապետության ՏԿԵՆ է ներկայացվել 37 ծրագրի ամբողջական փաթեթ՝ շուրջ 11 մլրդ ՀՀ դրամ ընդհանուր արժեքով, որը ներկայացվել է մարզի 7 միավորված համայնքների կողմից և վերաբերում է 59 բնակավայրերին՝ 139 ենթածրագրերով:

Համայնքապետարանների հետ համատեղ աշխատանքներ են տարվում ոլորտային գերատեսչություններից ստացված դիտողությունների հիման վրա ներկայացված ամբողջական փաթեթների լրամշակման, լրամշակված փաթեթները Հայաստանի Հանրապետության ՏԿԵ նախարարություն ներկայացնելու ուղղությամբ՝ միջգերատեսչական հանձնաժողովի հաստատմանը ներկայացնելու նպատակով: Միջգերատեսչական հանձնաժողովի 2023 թվականի դեկտեմբերի 28-ի նիստի ընթացքում դրական է հաստատվել 4 ծրագիր, որից 2-ը 2024 թվականի սուբվենցիոն ծրագրեր են՝

- 1) Մեծամոր համայնքի Նորապատ բնակավայրի 2-րդ և 9-րդ փողոցների կոյուղու կառուցում, 2-րդ և 9-րդ փողոցների և 9-րդ փողոցի 1-ին նրբանցքի ջրագծերի փոխարինում, 100,673,300 դրամ, 65% կառավարության, 35% համայնքի համաֆինանսավորմամբ:
- 2) Մեծամոր համայնքի Նորապատ բնակավայրի 2-րդ, 9-րդ փողոցների և 9-րդ փողոցի 1-ին նրբանցքի ճանապարհահատվածների ասֆալտապատում մայրերի և ջրահեռացման համակարգի կառուցում և Մրգաշատ բնակավայրի 9-րդ փողոցի ճանապարհահատվածի ասֆալտապատում, 277,733,470 դրամ, 35% կառավարության, 65% համայնքի համաֆինանսավորմամբ,

իսկ 2-ը՝ լրամշակված 2023 թվականի սուբվենցիոն ծրագրեր՝ Փարաքար համայնքի Փարաքար բնակավայրի Է. Թևոսյան փողոցի տուֆով սալարկում (դրական), Արմավիր համայնքի Արմավիր քաղաքի թիվ 11 մսուր-մանկապարտեզ» ՀՈԱԿ-ի շենքի հիմնանորոգում (դրական պայմանով):

Արմավիրի մարզպետի 23.01.2024թ. N 01/16/00547-2024 գրությամբ առաջարկվել է Արմավիր, Մեծամոր, Փարաքար համայնքների ղեկավարներին օրենսդրությամբ սահմանված կարգով մրցութային գործընթաց սկսելու մասին: Մեծամոր համայնքի 2 ծրագրերի մրցութները հայտարարված են: Աշխատանքները շարունակվում են:

3) 2025 թվականի սուբվենցիոն ծրագրերի նախնական հայտերի կազմման գործընթացի մեկնարկ

Պարզաբանման կարգով կրկին տեղեկացվեց, որ Հայաստանի Հանրապետության կառավարության 2006 թվականի նոյեմբերի 16-ի N 1708-Ն որոշմամբ սահմանված կարգով՝ սուբվենցիաներ ստանալու նպատակով համայնքների ղեկավարները սուբվենցիայի հայտը և նախատեսվող օբյեկտի նախագծման տեխնիկական բնութագրերը ներկայացնում են մարզպետի աշխատակազմ՝ մինչև ծրագրի իրականացման տարվան նախորդող տարվա **մայիսի 5-ը**:

Մարզպետի աշխատակազմը, ստանալով սուբվենցիայի հայտը և բնութագիրը, ուսումնասիրում է այն և մարզի սոցիալ-տնտեսական զարգացման մասով հայտի վերաբերյալ առարկություններ չունենալու դեպքում ներկայացնում է Հայաստանի Հանրապետության տարածքային կառավարման և ենթակառուցվածքների նախարարություն (այսուհետ՝ նախարարություն)՝ մինչև ծրագրի իրականացման տարվան **նախորդող տարվա մայիսի 10-ը**:

Հաշվի առնելով այս հանգամանքը՝ առաջարկվեց սկսել 2025 թվականի սուբվենցիոն ծրագրերի հայտերի կազմման գործընթացը, այդ ուղղությամբ անհրաժեշտ է հավաքագրել և ներկայացնել համայնքների բնակավայրերի առաջնահերթ լուծում պահանջող հիմնախնդիրները, որոնք գույքագրված են կամ արձանագրվել են հանրային տարբեր քննարկումների ընթացքում (մարզպետի 07.02.2024թ. N 01/16/01018-2024 շրջաբերական գրություն, ժամկետ՝ 16.02.2024թ.):

Բացի այդ, անհրաժեշտ համարվեց պարտադիր կարգով հաշվի առնել նաև Հայաստանի Հանրապետության կառավարության կողմից սահմանված առաջնահերթ ոլորտները՝

1. նախադպրոցական հաստատությունների կառուցում, վերակառուցում/նորոգում,

ինչպես նաև համապատասխան գույքի և կահավորանքի ձեռքբերում - 70-80% /անպայման ներառելով գույքի և կահավորանքի ձեռքբերումը/,

2. խմելու ջրամատակարարման, ինչպես նաև ջրահեռացման համակարգի կառուցում/նորոգում, ոռոգման համակարգի կառուցում/նորոգում - 65-75%,
3. աղբահանության ծառայությունների մատուցման համար մեքենասարքավորումների, տեխնիկայի և աղբամանների ձեռքբերում -50-65%,
4. հասարակական շենքերի (մշակույթի տուն, համայնքային կենտրոններ և այլն) կառուցում/վերանորոգում, ինչպես նաև համապատասխան գույքի և կահավորանքի ձեռքբերում -35-60% /անպայման ներառելով գույքի և կահավորանքի ձեռքբերումը/,
5. ներհամայնքային (տեղական նշանակության) փողոցների ու մայրերի կառուցում/վերակառուցում, հիմնանորոգում, **բնական քարով** (այդ թվում՝ չմշակված) սալարկում, խճապատում՝ համալիր բարեկարգման միջոցառումների ու տարրերի կիրառմամբ -55-75%, ինչպես նաև ներհամայնքային (տեղական նշանակության) փողոցների ու մայրերի կառուցում/վերակառուցում, հիմնանորոգում, **բետոնե սալիկներով սալարկում**, խճապատում՝ համալիր բարեկարգման միջոցառումների ու տարրերի կիրառմամբ -25-45%:

Նախորդ տարիների վերլուծության արդյունքները ցույց են տալիս, որ Արմավիրի մարզում դեռևս չեն ներկայացվել հետևյալ ոլորտների ծրագրեր, մասնավորապես՝

1. աղբավայրերի բարեկարգում կամ փակում,
2. քաղաքացիական պաշտպանության ենթակառուցվածքների, ինչպես նաև ապաստարանների կառուցում և նորոգում,
3. օպտիկամանրաթելային ցանցի/կապուղու կառուցում, բարելավում,
4. համայնքների քաղաքաշինական փաստաթղթերի մշակում:

Անհրաժեշտ է նաև հաշվի առնել հետևյալը՝

- մասնավոր հատվածի (կազմակերպություններ, ընկերություններ, բնակչություն), ինչպես նաև այլ դոնոր կազմակերպությունների կողմից ծրագրի 20 տոկոս և ավելի համաֆինանսավորման դեպքում Հայաստանի Հանրապետության պետական բյուջեից համաֆինանսավորման չափաբաժինն ավելանում է 5 տոկոսով,

- դոնոր կազմակերպության կողմից ծրագրի ընդհանուր արժեքի 51 և ավել տոկոս համաֆինանսավորման դեպքում նախագծման և շինարարական, ինչպես նաև գույքի ու տեխնիկայի ձեռքբերման գործընթացները կարող են իրականացվել նշված կազմակերպության կողմից՝ «Գնումների մասին» Հայաստանի Հանրապետության օրենքի դրույթների համաձայն, և ողջ գործընթացը համաձայնեցնելով համապատասխան համայնքների և մարզպետի աշխատակազմի հետ:

Հայաստանի Հանրապետության Արմավիրի մարզպետ Դավիթ Խուդաթյանը, անդրադառնալով արված հայտարարությանը՝

ա/ Հայաստանի Հանրապետության Արմավիրի մարզպետի աշխատակազմի զարգացման ծրագրերի մշակման և իրականացման բաժնի պետ Լիլիթ Մուշեղյանին հանձնարարեց՝ ձեռնարկել գործուն միջոցներ և մշտապես աջակցել համայնքապետարաններին համապատասխան փուլերով սուբվենցիոն հայտերի մշակման և սահմանված ժամկետներում ներկայացման ամբողջ գործընթացում:

բ/ Հայաստանի Հանրապետության Արմավիրի մարզի Ֆերիկ համայնքի ղեկավար Ռուստամ Հասանյանին առաջարկեց՝ 2025թ. սուբվենցիոն ծրագրի շրջանակներում ներկայացրել ծրագրային հայտ/հայտեր՝ հաշվի առնելով համայնքի ֆինանսական հնարավորությունը, ինչպես նաև ազգային փոքրամասնություններով բնակեցված համայնքների հետ կապված կարգում կատարված համապատասխան փոփոխությունը:

Օրակարգային հարցերի ու հայտարարության քննարկմամբ և ամփոփմամբ, Հայաստանի Հանրապետության Արմավիրի մարզպետ Դավիթ Խուդաթյանը Արմավիրի մարզի խորհրդի նիստը հայտարարեց ավարտված:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

ԱՐՄԱՎԻՐԻ ՄԱՐԶՊԵՏ՝



2024-02-22 15:10:31 GMT+4
Հավաստված է ԷԿԵՆԳ-ի կողմից



ԴԱՎԻԹ ԽՈՒԴԱԹՅԱՆ

Արձանագրող՝ ՀՀ Արմավիրի մարզպետի
աշխատակազմի անձնակազմի կառավարման,
փաստաթղթաշրջանառության և հասարակայնության
հետ կապերի վարչության
պետ՝ Դավիթ Դավթյան

